

二
西
園
文
集



二酉園文集卷之十一

不主因心而致情刺字 沔陽陳文燭玉叔著由

論碑

無之重脩龍興寺碑

淮安城西清風門內有龍興寺凡郡吏拜

闕祝

聖壽往焉寺創自西晉泰始間爲里人夏寬氏
所施唐宋及元命住持掌之頒帛給田咸有恩
澤詳在廬陵學士陳公記中碑樹于大明成化

初後至正德辛未遭火毀廢一空有僧明來號
天竺募化脩之造大殿九間鑄佛三尊煥然新
矣余會明來爲余言游天下名山者半貌古樸
誓苦行故能動衆而成大工也又以余與一二
友人論文談道於其上索余記之嗟乎色相有
無之間余安能知爾教哉大都無有可捨而後
能達有之源無空可住而後能知空之本法本
不生因心而起卽棟宇之新固起于一念耳由
是達五蘊除六塵會無生之精成無礙之慈何
嘗舍方寸以超三界哉故曰佛者明之而見性
儒者盡之而知性其心一而已矣于是明來率
諸僧羅拜誓肯若會余言者庸書諸石而施財
姓名悉載碑陰

漢漂母祠碑

漢漂母淮陰人余浮淮問漂絮處淮父老不知
也城西闔外有母祠余低徊祠下不能去云秦
失其鹿天下共逐獲于炎漢多韓信功方信釣
于城下母媯媯然飯信如家人豈亦知秦之當

廢漢之當興非此人不可特哀而進食耶當時
止嬰勿王勉陵事漢如陳王之母班生高其推
事理而探禍福也此何讓焉無論侮信擒信至
教以反者卽高皇帝蕭相國奇而用之尚難終
始何異亭長婦晨炊蓐食哉且母言大丈夫不
能自食而食之豈望報乎乃假王自請夷滅宗
族信之望與漢之報又何盭也獨母訓深遠矣
淮城春秋饗信祠母祠缺焉余謂信九原懷千
金報有大不安者移檄學宮如信祀僉曰可作

迎送二曲勒諸石俾淮人習歌而祀之其辭曰
赤龍起兮雲隨王孫游兮曾饑芳草萋兮
永思佩繽紛兮格于專祠 右迎神
炮牲薦兮于醢椒漿奠兮于壘嗟進食兮
若待羗不忘兮同茲淮海 右送神

柳將軍廟碑

隆慶辛未夏五月淮泗大溢黎民昏墊秋八月
水復溢環城不消士民告余曰水神有柳將軍
者宜祀之余檄山陽令具主設牲同教官博士

西園文集 卷之十一
弟子禱于淮之濱水夜退尺許士民神之告余
曰將軍捍水患宜廟祀之乃命經歷李鳳鳴卜
地城西之南河爲殿三間省將軍貌大門左右
室各三經歷善于董事數月乃成請余記之憶
米芾在宋哲宗時守山陽史稱其治民有道不
事淫祠賦詩止禱米襄陽人與余鄰其詞翰在
當年蘇黃間平生所嚮慕又後先守茲土其行
事胡相遠顧從民而禱從民而祠惟民是便惟
神休是賴至否德罔克弭變愧元章爲多若將
軍者何可弗祀也因記于碑俾禱水旱者觀焉

海州脩學碑

海州邊海而城隸于淮鄰于鄒魯境內有山孔
子嘗登其上豈其歷聘莫遇欲浮于海與當時
王道微缺洙泗之間斷斷如也故百世廟祀不
絕云海之有學肇造于唐貞觀間若漢蕭望之
匡衡皆經術知名之士則漢已有學莫可詳耳
乃脩學在元至大辛亥有魏君榮
明成化辛卯有陶君文熙弘治壬子有陳君廷

珪至于今令名焉嘉靖來

先皇帝頒敬一箴于東海上此脩學一會也而有司莫之能舉奈何日傾敝也隆慶庚午余甫至淮移檄前守周君世臣脩之凡大成殿東西廡戟門櫺星門拜堂齋諸處用帑金規畫措置明年仁和鄭君復亨以文學飭吏事煥然易故復爲肄業數十舍意益弘遠矣余觀漢承秦絕學之後師異道人異論一二儒者上書以爲諸不在六藝之科孔子之術者皆絕其道勿使竝進而士多以經術顯今士誦法孔子其道大明反不逮漢何哉夫觀于海者難爲水游于聖人之門者難爲言盈科而進成章而達旨哉孟氏之言有本也苟爲無本卽日游于聖人之門亦朽木糞墻不可雕朽耳又安望興起于百世之後如前所稱經術士也是不大有負于學宮哉茲役也始于某年月日成于某年月日費約而工集成可大書于是訓導馬奇易仕率諸生來請紀學事而同知郭惟遠判官劉縉吏日蔡學

一書園文集 卷之二
五
範復鑿于石

崇正書院碑

清和縣濱淮水舊無城郭亦無書院西北隅有
淫祠知縣張君維誠欲毀而新之移檄于府余
壯而許焉乃構室治垣中爲明道堂左右齋有
十其地廣二十五丈深倍十丈閱月乃成扁曰
崇正書院教官沈梈桂集安率二三子請余一
言嗟乎道也者所繇以適于治也三代以來若
大路然其後天下眊亂至尼父子輿寢明寢昌
非但楊墨塞路始欲正人心以闢之當洙泗之
間惓惓于脩慝辨惑崇德之旨卽夷惠不由桓
文不道蓋思反于正也漢之醇儒莫如董子其
言按春秋一元之文而以王道之端歸之于正
又曰積善在身猶長日加益而人不知也積惡
在身猶火銷膏而人不見也可謂知其所崇矣
今士習大壞計功謀利多邪枉之途如漢之孝
弟力田賢良方正胡可得也夫以隋侯之珠彈
千仞之雀世必笑之乃以吾心之正而使邪氣

三才圖會卷之十一
九
奸于其間顧不怪焉何哉諸生旣取仲舒之語以名其堂且日游焉余述其言而極論之亦願諸生加之意而已因書而勒諸石

河清書院碑

嘉靖隆慶間黃河屢決下邳同于陸漕舟淤阻世宗春煉一丈之丈而三丈之流輸之十五穆宗先後遣大臣導之入于海邳州刺史許君大經工成之後興學造士闢爲書院扁曰河清諸生以爲義舉也向余請記嗟乎黃河蓋自古爲中國患云源始昆崙在絕域萬餘里余過龍門慨然詢禹之遺烈焉南華陰東底柱而北九河何其順也諸生日游河清書院卽思所謂清者足矣且性猶水也逆之則濁順之則清今仁義之談日甚孔子之道大明已無異端甚于洪水者乃經術吏治勿論隆古顧不逮兩漢何哉亦無未窮源而自失其性耳昔之聖賢卜居海濱以待天下之清

明主方隆唐虞之德西涉流沙南盡北戶東有

東海北過大夏人迹所至罔不臣服
登極以來屢下賢良方正之詔諸生多茂才異
等藏脩效用又何可自負于時也語曰俟河之
清人壽幾何君子蓋嘆遭際之不偶云書院地
廣若干深若干垣舍若干多刺史捐俸所創而
系名以河系河以清意益閑遠莫窺矣

宋諫議田公祠碑

田公諱錫字表聖蜀之洪雅人直聲動天下宋
時繪公之像就學宮祀焉邑尉孫長民有記元
省邑入夾江學廢而碑亦湮滅云國初成化仍
祀于學正德丁丑御史盧公雍按蜀肇祠于九
勝山下邑人御史張公鵬有記嘉隆之際傾圮
幾廢余奉 璽書課士于嘉州刻公遺草下新
祠之檄知縣聞道立雅意脩緝審曲面勢墜茨
績椽堂舍巋然矣乞余書麗牲之石嗟乎若公
何可弗彰也往蘇文忠公序其集謂公古之遺
直也盡言不諱自敵以下受之難堪况人主乎
范文正公銘其墓謂公天下之正人也昔三代

有諫臣故教化盛而歷年久公不盡用于太宗
眞宗之朝豈天獨厚于古與司馬溫公書神道
碑陰謂公日有獻月有納以贊成咸平之治信
如三公言則公名其天壤乎又何患弗彰也考
公立朝章疏凡五十上自謂諫職宜爾悉焚之
厯存十餘篇咸關國體者中云聖人廣德不務
疆土卽得夷地此獲石田者耳今諫官不聞廷
爭給事中不聞封駁左右史不聞紀言動豈朝
廷美事乎當時優詔褒答其後言邊事頗詳夫
動靜不可妄舉安危不可輕議在選將用謀辯
奏報之虛實察左右之蒙蔽而已深憂匈奴有
輕中國之志趙普李沆聞而避之千載而下使
人發汗沾衣寧獨悲于宋也昔主父偃奏賈誼
之策魏相條晁錯之對後有謁公祠而思奮善
公言而效之君者茲舉其倡之哉茲舉其倡之
哉因紀其事而歌以侑神其詞曰
憶瓊佩於咸平兮當宋之中季旣練要以脩姱
兮諫垣之是寄羗敷衽以陳辭兮恒朝詳而夕

替知譽譽之爲忠兮不量鑿而正柄新祠宇以
妥神兮况舊鄉其勝地皇剡剡其揚靈兮實人
心之共繫奠桂酒與椒漿兮勵忠臣于永世冀
廻翔于杳冥兮與河山而並麗
重脩崇仁祠碑

歲革除己卯

文皇帝內靖師促草詔天台方孝孺等死之兵
部右侍郎胡子昭與焉公嘉定之榮縣人字仲
常師方先生而死同其時蓋異數云自是天下

諱言之二百餘年里人始祀公扁曰崇仁祠督
學陳公鑿有記余至嘉定榮縣令王建元新厥
祠同教官石磐陳時敏率諸生請余碑焉嗟乎
孔子于令尹子文則忠之于陳文子則清之于
夷齊比干則仁之馬遷氏以爲得夫子而名益
彰者卽公痛哭入朝咄咄大義斯亦叩馬之諫
矣餓死剖心何怨耶又其弟僉事志遠負母逃
去其女金奴沒爲宮婢而乞歸皆成公之志者
求仁而得仁非耶余爲迎送神曲書麗牲之石

其辭曰

報主果烈兮千秋一時三江襟帶兮公其

歸斯心而右迎神曲

悠悠滎水兮注于孤城公名竝遠兮愧彼

馮生限于右送神曲

脩都江堰碑

灌縣都江堰蓋江之會云禹導江自岷山西入
大渡河南過于汶歷于灌堰在江中流爲二有
南河者會新津有寶瓶口者流爲三至于漢至

于崇寧至于華陽故稱灌口堰外低而寬堰內
高而狹水勢也作堰灌田始秦守李公冰司馬
遷著河渠書瞻蜀之岷山大李公之功且云渠
可舟行民饗其利蜀人廟祀焉漢唐以及宋元
堰法漸壞至元間僉事吉當普鑄鐵龜民利之
昭代以來屢脩屢圯嘉靖間復鑄鐵牛詳在僉
事陳公濬記中其銘曰問堰口準牛晉問堰底
尋牛趾堰堤廣狹順牛尾水沒角端諸堰豐瀕
稱高低脩減水真名言云萬曆乙亥江大溢堰

盡堰成都知府徐元氣灌縣知縣蕭奇熊列狀
脩復巡撫都御史曾公羅公慨然允行後先軫
念巡按御史郭公慮益深長增以鐵柱命尋牛
趾而濬之自堰以下如仙女三泊洞寶瓶五隄
口虎頭諸岸間植三十鐵柱每柱長丈餘共用
鐵三萬餘觔又樹柱以石護岸以木水遇重則
力分安流則堰固大都倣古云水利僉事杜公
詩悉心區畫始萬曆三年十一月越四年三月
王成費金三百灌漑千里民咸歌頌御史公適
還朝復按茲地左布政使素公隨右布政使潘
公允端按察使劉公庠叅政蔡公汝賢秦公淦
副使王公原相僉事甄公敬共觀厥成燭聞而
嘆曰蜀稱天府號陸海豈謂沃野不在人耶秦
法作渠與井田竝太史公論禹廝二渠以引河
其來舊矣如西門豹引漳水鄭當時引渭水足
利于國中原變遷間殫為河法多湮滅惟李公
之堰幸存于蜀乃二三公脩之俾古人遺意千
載如新尚永賴哉今天下事鑿者創新論怠者

失故道及其不支諉曰天也沉璧負薪何益焉
假令人皆師古則行山表木之勲至今存耳寧
獨一堰哉余益嘆二三公經世之智云曾公名
省吾羅公名瑤俱楚人郭公名莊關中人觀者
考焉汶川知縣趙汝誼蒲江知縣余棠有勞于
堰者餘載諸碑陰

建武所崇報祠碑

崇報祠者像都御史曾公而思報者也按祭法
曰以勞定國則祀之能禦大災則祀之乃生祠
非古也其因功而繫之思乎斯民也三代之所
以直道而行也此何可已焉都蠻蓋古西南夷
危巢鬼谷丘陵曼衍素患中土而于今尤甚往
往焚我宮室剔我士女掠我旄倪高珙慶筠長
興之民日不堪命將胥衣冠之俗而附雕題之
長矣昔天順成化時十八萬征之而不克嘉靖
隆慶間數十年撫之而未寧安所決策哉萬曆
改元曾公撫蜀上書其略曰 聖明御極殊方
絕域重譯納貢喁喁然嚮風慕義無如蠻之負

固者臣愚以爲剿之便總兵劉顯善用兵橫被
口語願公明主彰使過之仁書奏上俞允之公
奮然秉鉞歲癸酉三月如敘誓師曰
天子以蠻敷虐于爾百姓剿絕其命余恭行天
罰嗟爾有衆勗焉時土漢兵十四萬公以意授
顯顯以身先士如身之使臂臂之使指也遂誘
縛酋阿苟等五月一日至凌霄寨拔之六月十
八日夜斬酋阿墨等至都都寨拔之時阿二方
三守九絲又阿大阻鷄冠嶺九月九日乘蠻被
酒斬關而入至九絲寨拔之其小寨以百數斬
首以萬數拓地四百里獲蜀漢銅鼓九十三面
凱聞上悅而告廟百官稱賀晉公右副都御
史蔭一子太學生總兵顯而下論功行賞始張
官設學列雉爲城上命曰建武所詳在大學士
南京陳公碑中嗟乎漢通西南夷蜀父老不便
也司馬長卿詰難之其言至今不廢云彼稱六
合之內八方之外有不浸潤于澤者聖君耻之
而况蠻爲大患如今日者乎卽夜郎一線三年

未竟今功成數月耳人多言征蠻不便者假令
拘文牽俗如向來撫議真以湯止沸抱薪救火
耳烏能成功哉公昔尹富順往來敘南蠻在目
中矣又元輔荊州張公素知公才主上問公
何如人推心委任置顯謗書不問公倚之如長
城操之如嬰兒見得其死力以報國兵法曰有必
勝之將無必勝之民今觀之允信讀公宗功一
記不自有其功意深遠矣越三年召公兵部侍
郎蜀人建祠于新城若干楹顏曰崇報深山窮
谷龐眉皓髮之夫感泣不能去以爲拯已于水
火之中也三代之兵若時雨公宜永祀茲土哉
叅政李君江陳君大壯叅議楊君一桂僉事羅
君向辰命燭伐石紀焉燭謂公之功無論太常
所書卽百世口碑焉又四君皆佐公有勞者不
具論獨論其大者如此公名省吾字三甫郢中
人嘉靖丙辰進士

敘州府建學碑

余嘗登峨眉山其靈秀由馬湖至于敘蓋有少

峨山云去府治四十里又延爲翠屏山則益近而凝結在城之中每一登覽北枕梁山南拱七星左右在東塔等山而馬湖川江之水合流而東真俯瞰其盛哉卽今學地也國初建爲敘南衛成化初改建藩府亦未就封而府縣舊學僻在一隅敘之人士久議遷云萬曆乙亥維揚陳公守敘以九絲功成擢叅政仍知郡事始決其議會余試士過敘南昌楊公一桂分鎮敘南雅意作人又力贊之乃倣姑蘇肇慶之制合二學

而爲一中爲文廟左爲府學右爲縣學其明倫堂各一其致道堂共爲五楹凡啓聖祠櫺星戟門泮池射圃衙宇齋房如制區畫方廣四百餘丈繚以圍垣後培土爲山植以松栢鬱若蟠龍焉工始于乙亥十月成于丙子八月是年舉于鄉者四人陳公謂余董學事際厥盛也屬余記之嗟乎三代之時鄉射飲酒養老合樂勞農訊獄飲至獻馘之事咸在學宮而籩豆簋簠之器鐘鼓管絃之節乃其禮樂粲然明備正以父子

之親君臣之義夫婦之別長幼之序朋友之信
莫不有中道焉惟以復其中而已當時沫泗之
間所稱文學之士如游夏諸人咸以致身為忠
竭力為孝愛人為心易使為職曷嘗不文之以
禮樂而外倫以為學乎我國家郡邑建學二
百年來涵儒道化今上中興留意治本又用
輔臣之議將憲臣璽書更新毅然三代之上
卽蜀在一隅尊崇孔氏人文丕變幾于西南齊
魯矣竊謂文盛而敝豈惟盭古昔哉視弘德間
遠矣商功利者託之乎能而實則管晏之術也
談空寂者託之乎奇而實則佛老之談也董仲
舒有言曰春秋大一統者天地之常經古今之
通誼也諸不在孔子之科者皆絕勿進今乃以
孔門所不道者慕而為之此何說焉不獨蜀士
爾也賈誼有言曰移風易俗使天下回心而向
道類非俗吏之所能也而俗吏之所務在于刀
筆筐篋卽郡守新學移易風俗舉古循良之政
而游于學者果能舍舊圖新易偏至中俾彝倫

攸叙達可見之于行庶無負于茲學無愧于山
靈哉傳曰自新新民君子無所不用其極不佞
交有望焉是舉也巡撫都御史曾公省吾羅公
瑤巡按御史郭公莊何公汝成後先同議叅政
李公江僉憲羅公向辰捐金協助同知曾君可
耕通判朱君克推官吉君可久知縣許君一德
營度爲勞經歷陳鉞照磨李孟雷知事何銓檢
校王汝慎王簿汪縻典史黃瑄趨事益勤學旣
成法皆得書而輸金督工員役咸具于碑陰陳
公名大壯字思立嘉靖壬戌進士

傳

內方童先生傳

先生諱承敘字士疇沔陽人也始祖自隨徙沔
而沔南有內方山因號內方山人海內學士大
夫稱內方先生云往太守公諱旭者生先生有
異質雙目炯炯不類凡兒八歲時過目成誦爲
文數千言立就先生少失母其繼張太恭人性
嚴先生事之最孝年十二賦行路難以見志太

守公覽而大叫曰兒爲古文辭乎里中一二長老以爲主勃李邕復出也太守公以戶部郎出守兗州坐正直忤魯藩逮繫詔獄先生與之比其辯論諸疏草悉出先生手而太守公得調桂林未幾太守公歸而先生亦歸大梁李公濂守沔國朝之文在弘德間李公夢陽何公景明爲之一變而李公與獻吉仲默交驪號中州才子見先生奇之而先生樂從焉時家按察公以童子亦受知于李公先生益下帷讀楚詞文選及六朝文咀其英粹故舍芳擗藻若夏雲秋水不可方物時正德己卯甬川張公邦奇督學又奇先生文嘆曰真楚才乎薦于監察毛公伯溫以詩經舉鄉試第二兩公尚恨先生不第一也明年庚辰中會試值七蓋四業

肅皇帝繼統選翰林院庶吉士與茶陵張公治蒲圻廖公道南號楚三才而先生尤俊逸不羣試輒冠同館而同館敬服人人自以爲不如也方楊文忠公廷和楊文襄公一清後先入相雅

重先生後永嘉張公孚敬議禮登相援引新進
館閣之士附之如蟻結之如蟻嚙脊背憎汲汲
如狂而先生閉門守玄意澹如也乙未分校會
試所推轂多名士若大學士郭公朴祭酒敖公
銑尤表表焉壬辰公補國子監司業

上方更化而祭酒又關中呂公聃倡明正學先
生佐之留意教化呂公教主嚴如泰山喬嶽壁
立萬仞而先生兼用寬如和風慶雲令人景慕
環橋門而觀聽者以萬計前此未有也先時先

生脩

列聖寶訓實錄及會典諸書進先生左春坊左
庶子兼翰林院侍講仍攝國學歲庚子先生主
順天鄉試得劉一麟等一百三十人其程文典
麗學者式焉壬寅上疏省封樹
肅皇帝俞允命馳驛以行蓋異典焉先生歸與
親知倘佯江湖放歌命酌里門來親就先生者
日衆先生油油然與之偕而無間人言魯文恪
公鐸居鄉純謹至比先生云無何先生病且卒

主上聞而憐之遣官諭祭嗟乎先生周旋詞林
二十餘年往聞然與之密而無聞人言魯文公
上御經筵先生講立政諸篇倦倦于用正人端
國本又聲如洪鐘徹殿庭益其與高公坐說與
上喜動顏色賜飛魚服而中貴人往往走問童
先生不休蓋大拜之兆也時故相貴溪夏公言
忌先生才又學士多遺貴溪公金得美遷先生
笑曰何可爲此耶遂甘心不調而奉使唐藩
唐王慕先生名厚幣請先生文不應別時一物

不受其節槩如此世俗所難先生尤其細者先
生早慧英敏天骨秀朗緩頰而談傾其坐人平
生好藏書又好藏古今名畫法帖每一屬文筆
端風起如掀雷抉電又如江河東注其詩文多
不存藁多口授使者在先生不經意而得者寶
之大都出入漢魏六朝自成一家言其字畫適
逸秀媚置趙文敏真蹟中莫辨也先生少悅紛
華之習及至中年刊落殆盡嘗寓書大梁李公
曰往者觀書如端冕聽古樂惟恐卧耳近稍知

紬繹容有感通之地為文牽於事實近稍擺脫
 容有獨出之意豈犬馬齒長故蓬心漸開邪抑
 數年憂鬱將有所激昂邪李公會出示余今集
 中無有也所著沔陽志得遷固法海內名志如
 康德涵撰武功王敬夫撰鄆縣及先生而三也
 先生有甥王給事願屬余定先生集而余為先
 生從壻知先生孝友多馴行與子守履收先生
 文十僅一二自足名世今梓郢上者多應酬作
 有家按察公序余小子尚卒卒未定也先生沒
 且久始祀學宮余列其遺事獨幸論先生者定
 也夫又聞邑國士皆為州縣吏
 陳子曰西蜀楊用脩不可一世士而獨善童先
 生多往來翰墨廖學士撰楚紀稱先生學登大
 雅其國之良史乎乃觀郡乘充信家按察公每
 言先生樂善忘勢汲引後進如渴乃天年不永
 相業未就卽文章亦不盡傳何哉語曰造化忌
 名乃先生名赫赫江漢恐造化莫奪矣

洞庭漁人傳

洞庭漁人者楚華容人也姓孫名宜字仲可一字仲子家洞庭湖上自號漁人海內多稱漁人云生有異質穎記殊絕年五歲隨父副使繼芳公入京師過興隆寺見羣兒講藝卽低回不能去而副使公與信陽何仲默善得遍交諸名流如亳州薛公采閩中鄭善夫西蜀楊用脩見漁人詩賦大奇之每一面試萬言立就往往嘉嘆以去又同邑周子賢黃岡王稚欽隨州顏惟喬復延譽于公卿間以爲張衡王勃復生也嘉靖壬午關中許伯誠來視楚學得漁人卷嘆曰楚才楚才時漁人方少俊諸生莫及也戊子舉于鄉屢試禮部不第然詩文日益有名辛丑遭副使公喪哀幾損目得神人秘方始愈年三十有八遂絕意世故時往來洞庭煙水間且曰屈平放逐始賦離騷馬遷被刑斯成史記我今窮愁當著書藏名山耳何僕僕自苦也乃賦七游著遜言十七篇語多垂訓者又以明典文體至弘德之際北地李獻吉力于復古漁人私心慕

焉又習聞何先生論是以文章命意脩詞爾雅不羣有史漢之風至詩律法杜甫長歌在唐初四子間尤號雄放莫可窺際古體多宗梁齊蓋褻然大家云日坐玄石山堂誦讀不休絕跡公府士大夫非專訪者輒避不見人呼進士公不應呼漁人則應時時爲登臨計酒酣擊缶而歌嗚嗚甚驩也自經史子籍老莊浮屠言外凡國朝典故遠方謠俗與名臣事蹟如指諸掌又于時事談說奇中其通敏若此而志狀則言漁人性純厚孝友不妄取予憐才如渴凡經指授者多爲名士聞人有善無問識不識率擊節獎與卽不能表揚亦爲詩文傳焉所著有洞庭漁人集六十九卷兩都集十卷洞玄誌三卷宋元史論二卷明初畧二卷岳州誌三十卷孫氏日抄六十二卷王氏易七卷天文書八十二卷國朝事蹟百二十卷求言錄十五卷藏于家漁人才瞻學博志在用世行誼至高潔竟偃蹇自廢年五十死斯足悲矣漁人有二子斯億斯傳

能世其家學

陳生曰余泛洞庭湖蓋汪洋大也時漁人已下世吊其墓讀喬景叔所爲墓碑謂霍文敏公韜欲以誥勅事薦漁人漁人謝絕乃已今所著書有太史才安論遇不遇也斯億與余善余知漁人頗詳令後世有述焉

金堂曾公傳

余讀太史公傳循吏謂奉職循吏理可稱良焉以爲易耳及守淮陰脩郡志見賢令無幾今觀曾公在蜀有兩漢風作金堂令傳

公諱遜字克讓別號東莊楚之安陸州人也公性最剛正由正德辛未之官及嘉靖戊寅解去業八年矣左右莫能窺其意有神明之領先時遠昨逋賦不受約束長捕一人逮繫之公曰何苦黔首也榜諭諸鄉如期呼集又戶給稅帖勺籥有稽無因緣爲奸者民使之歲大旱當路催科急公曰何忍敲朴也每素衣草履徒拜而禱天乃雨又脩濟留倉積穀數千石巡行郊野勸

農力田雖雨亦往時課諸生以孝弟不專于文
藝而公之自處清約如諸生獨以直忤當路當
路巧詆之遂浩然歸百姓遮道泣焉囊無一錢
可以買舟而任內因公住俸得數十石上官憐
而與之行至荊州阻雪用盡歸甚窘公語親知
曰吾做官教得一孫幸矣蓋指少叅公璠少叅
公長者每言及公輒泣下余猶得而記之諸生
祀公于學宮者四十餘年至歲乙丑公有專祠
又十餘年而都御史省吾公之曾孫也來撫蜀
始買祀田新厥祠

志銘

陳生曰曾公眞清白吏公後顯人言有天道假
令公後如古孫叔敖則清吏有餘名公何所藉
哉

之父也往

西園文集卷之十二
公之...
公語親知

公語親知

公語親知

公語親知

公語親知

二酉園文集卷之十二

沔陽陳文燭玉叔著

墓誌

贈國子監助教梁公墓誌銘

龍川先生姓梁氏大理寺評事柱臣之父也往
彥國交余甚驩也為余道其家行且曰先君已
矣未有銘其墓者今改官南都過廣陵屬歐積
伯狀之願子一言託諸金石明年果以狀來歐
乃先生里中子文學掌故余采而志之先生諱

獻言字諫甫廣之順德人也先世有隱德系出
南海龍頭里人稱龍川先生云先生少俊通經
史尤專門毛氏詩家無廬舍無僮石之儲宴如
也里中推爲社學師嘉靖己丑補縣學弟子員
御史陳公大用行部試先生首諸生也遂檄縣
令就鳳凰山之麓築室以居下帷講藝幾二百
人五嶺以南業詩者習梁先生之學矣先生八
試有司輒坎壈居嘗敦行周人之急有老嫗遭
疫行乞于市人多避其傳染乃食于廡下而藥
石之且曰吾不忍委溝中耳友人周廷綱垂老
窮獨延于其家且曰吾不忍無炊火耳遭父母
喪嘔血幾死忌日必齋且曰傷哉貧也能歆茲
魚菽之祭乎授詩至蓼莪諸篇收淚廢書聞者
沾襟焉往先生早孤族人迫其從軍借貲與之
始罷從軍終身遇族最厚督學蔡公克廉張公
希舉獎先生行太都謂安貧若黔婁居喪若二
連說詩若匡稚珪又談國家利害奇中乃公車
不聘困草野以死悲哉悲哉先生生于弘治乙

卯某月日卒于嘉靖丁巳某月日年六十三葬
某處配陳氏先卒生一子一女繼配吳氏女適
馮子益子即柱臣也舉丙午鄉試仕灤州學正
召入成均贈先生爲國子監助教孫男一人曰
策勳孫女一人柱臣懷鉛提槧善詩歌也先生
曰窮賤易安幽居糜悶莫向于詩第古者田夫
野婦其言與王公大人竝如兔且鷄鳴足感動
也謂其真耳後世補采摛文詩道愈缺小子勗
哉其言得三百篇遺旨余備載以傳柱臣能世
其家學銘曰

不于朝試厥里不于身顯其子嗟令名真不死
啓荒埏公藏此

明故山東道監察御史胡公墓誌銘

侍御公沒十五年矣其子維孝向燭泣曰幸吾
子銘先公墓憶髫年時聘公仲女女卒而公慟
無何公亦卒公之諸子又卒今尚使余潸然承
映也顧知公生平十闕八九此何以稱焉敢述
而納諸壙俾後有知公者按公諱彥字穉美世

居江夏近太白湖自稱白湖子始祖受官沔陽
衛千戶蓋從

高皇帝中起云數傳而有紀始紀生公時宋孺
人夢日月墮于懷公孱弱不盈掌啼聲如鐘稍
長貌癯然玉立風儀秀朗讀古文尚書等書輒
能誦善屬文長老異之且占前夢爲文明兆也
咸謂能大胡氏者正德丙子張公邦奇愛其文
補諸生里中有時庵任先生者識賞少俊每見
公文即夜半燒燈讀鼓掌大叫曰胡生胡生奇
甚矣公與馬兩生家大人結文社歲戊子許公
宗魯又愛其文言吾自關中來此塵見者其年
以尚書魁楚家大人亦偕舉乃兩生竟不第後
四上春官而母宋孺人卒哀毀愈骨立辛丑舉
進士高等授太常寺博士公職典冊祝至上前
書御名拜稽伏地
上命中貴人扶出是時
上恚祀猶親出郊故榮遇如此越三載選山東
道監察御史視南城事往中貴人多以私干御

史獨不干公公上書陳國家便宜數策其一則
議建 太子云海內纓綏紳佩之士景附響和
矣乙巳秋視陝西茶馬革積習如洗著茶馬考
若干卷許公里居躡其書敘之中云曩奇胡子
才是書特一班耳許公文雄關中亦以此多公
戊申考最封父為御史奉 命視江西江西交
吾楚號巨省公甫臨諸吏鯁鯁畏凡脂膏自潤
與鷹擊毛摯者解印綬去有司索得部內豪猾
公曰柰何扞當時之文圍乎抵誅不少貫又鄱
陽贛城間盜多歛避無揭竿山澤者已酉當校
士公申飾諸司籲天以從事不解衣者旬日品
諸士文及錄而式者多出公手有一教官中諸
司白于公公曰吾廉其才耳此何避竟中斯人
余同年蕭君廩張君秩皆公所取士道公頗詳
焉庚戌秋宅繼母孺人憂明年公逝矣嗚呼公
磊落感慨負才人也通曉國家機務邊圉要害
人才淑慝民生休戚每振手而談斷斷如也所
過輒下車周詢埋輪攬轡皆呼公為名御史公

視台衡如取寄耳乃未竟卒何哉往醫問公病
公諱不言及死不言身後事意嘗墨墨者假令
公不死必擅功名上駮古人矣今蓋有蒼生之
憾云公生弘治壬戌年十月十一日卒嘉靖辛
亥年五月十八日葬癸丑年正月七日墓在江
北小河口年才五十耳配劉氏封孺人子四維
坦娶丘氏維翰娶馬氏維寧娶楊氏皆天絕維
孝國子生蓋公官博士時生京師者娶王氏女
一適童太史子燭旣撰公行而系以銘銘曰

才華繡口彈疏鐵肝公居柱下惠文峩冠多士
甄拔黔黎又安公過彭蠡大振羽翰江城葱鬱
漢水彌漫公藏窀穸令名其完

尚寶寺卿母公墓誌銘

隆慶元年修

世宗寶錄諸曹集其事余得讀寺正母公議禮
疏真古之遺直也時 詔卹錄建言存者尚用
公當爲蒼生起而以例引年不果召進階尚寶
卿竊爲公訕之公蜀之南充人公子言余所優

士持公門人楊進士沂狀請余銘憶官廷中慕
公今公往矣何可辭焉公諱德純字惟一號浴
溪唐學士母丘儉之後有仲文者自楚麻城徙
蜀數傳生公父讚封評事母王氏生公三歲卒
繼馮氏咸贈封孺人云公幼有異質屬對尤奇
過目成誦又事繼母善有曾閔之行長老曰孝
者所以事君也宅日其忠臣乎年十六補諸生
博極羣書家貧無膏夜以薪代正德庚午舉于
鄉十二年登進士第授大理寺評事公行履嚴
恪法比詳明嘉靖元年考滿獲封典二年陞左
寺左寺正奉旨同修武宗實錄三年七月十
二日有詔集議大禮公于十三日率部院諸公
工本十五日跪門伏闕叫哭

高皇帝

世宗震怒下錦衣獄十七日有旨移鎮撫司打
八十至拶斷一指復入刑部公絕者屢家人號
哭恐無以爲殮也至八月初一日奉旨克軍得
湖廣房縣守禦千戶所公欣然就道房在鄖陽

萬山中至十年會白蓮教起公與知縣李璋冒
矢石擒之又教民間俊秀者多所成就十六年
始歸十七年 恩詔冠帶公貧如諸生與評事
公爲暮年驩以基業讓二弟力撫其孤姪暇則
講經談道出公門下者科貢幾二十人又與尚
書韓公士英叅政楊公麗結真率會年八十五
及授 穆宗新命嘆曰吾老幸見太平何以官
爲望闕稱謝公生成化丙午某月日卒隆慶庚
午某月日娶范氏封孺人子言吉召啓俱郡學
生墓在縣石馬坡嗟乎公負才抱畧剛正不回
財見一疏止耳然鄉人社祀之房人廟祀之此
其聲施後世矣且國家人材自天造靖難後莫
盛于議禮之時祇承者良如遂寧席公書是也
逆鱗者忠如新都楊公慎及公是也蜀古多奇
士今觀之尤信銘曰
思如泉直如絃公之忠配前賢山可阡江可田
公之名永萬年

吏部進士王公墓誌銘

肅皇帝朝歲乙丑不穀同王公舉南宮云公未
奉大對歸省乃郭母董母相繼而卒隆慶辛未
殿試賜進士觀吏部政月餘上書曰臣父棄臣
何母祝天而生臣年幾九十昔人所謂盡節日
長報劉日短矣

穆皇帝允公終養萬曆甲戌余過蓬溪訪公家
徙四壁立何母又卒公泣曰三母之節如一敢
藉片言表之不穀唯唯而逡巡不果爲忽聞公
逝漬酒奠焉今聞公葬三子持鄉進士李子映

枝狀泣而請銘嗟乎可終前諾矣按狀君諱庭
字以觀別號鳳臺世爲蓬溪人祖溥以歲貢入
國學父峨有隱德人稱處士公娶何氏無子復
娶郭氏董氏比處士公卒而三氏煢煢誓從一
也時郭孕三月至七月而公生三母嘆曰未亡
人之幸乎公縮髮以來爲文有聲歲巳酉學使
陳公濠奇之補邑諸生三母額績紡工刺繡佐
之而公多下帷之思歲戊午領鄉薦里中從學
者衆後登第歸養也日奉何母驩暇則閉門讀

書出入問巷布袍草躋不乘輿馬郭外有田數畝身親蔗藜與野老伍里人有抵罪者持金乞公爲之地公曰柰何溷乃公有司簞簋不飾者里人乞言于當路公曰柰何非大夫市中有無賴業餅者與家僮歐無賴者大罵公公不較縣官縛而笞之兼病死語連公公不辯其量如此未幾何母九十終公哀毀過傷以病終夫公家三母貧而婆撫公在遺腹成進士公後先就養人言慈孝盖天報云公平生行履貫諸神明乃

不以功名顯死財四十五齋志入冥柰何有天道余甚感焉公生以某年月日卒以某年月日子四人與忠與孝與廉俱庠生少與節女四人俱許聘余從諸生之請祀公于社謂公孝廉可風世也因誌而銘焉銘曰嗟九原兮見而父嗟令終兮從而母嗟有穀兮昌而後嗟造化兮思而多取

洞山禪師塔銘

禪師名道潤別號洞山人稱禪師云父周并母

李氏家世沔陽潤始生不乳祖母王夢一老僧
化入天竺國中隨喜拜報恩寺僧惟吳爲徒甫
十齡落髮性覺慧曉釋典長襲僧正好結客揖
客發長嘯聲喜藏學士家言登臨治具了無倦
色晚入家按察公高年社中往寺圯漏潤嘆曰
正法沒而象教廢矣象設闕而晬容妥矣吾其
葺靈宇哉募緣有力者拓寺前地十餘丈爲山
門鑿鑿心池亭新萬壽閣大雄殿創僧正司崇
基表刹莊嚴諸像色相煥焉家按察公有記憶
余少時潤索余書余書布施以廣義也持戒以
守信也忍辱以爲謙也精進以思敬也禪定以
守靜也智惠以通理也潤曰願終身誦六度每
四月浴佛之辰炊烏米飯食客滿座余生以八
日輒向佛祝余謂余曰它日得公銘我塔成佛
矣潤生弘治癸亥二月二十二日卒萬曆乙亥
十二月二十五日壽七十三其徒普暉普暄普
暉普煦等介李子少白請余銘禪師塔在七里
院刺史王公題曰洞山定所嗟乎無色之外方

爲化城非想之中猶稱火宅言定之難也潤乎
潤乎今定矣余爲之銘

銘曰焚燎堅林杜口而進寶相金咨息心而問
列刹如山脫屣而寧棲遑大千余言不佞

日明故隱君忍齋邵先生墓誌銘

普安有邵長公者祭酒孫公應鰲高其行作隱
君傳人稱邵隱君云嘉靖乙丑余同晦之舉進
士謂余曰吾仲氏元善官四川僉憲叔氏元高
官贛州府丞元哲有今日隱君之教也萬曆戊

寅余過濟上晦之爲山東按察司副使向余泣
曰隱君逝且葬矣葬而不得韓君記昔人猶弗
葬也遂狀其行命其子鄉進士以道請余銘余
與晦之後先守淮吾于隱君通家弟列也銘何
可辭按隱君諱元吉字修之別號忍齋世爲應
天上元人六世祖旺從戍貴之普安數傳而中
憲公華譜配金太恭人生子四隱君其長也少
嬰弱疾性凝重峭直通易通書通春秋爲諸生
有名宜興萬公士和射洪謝公東山賞其文擊

節焉歲庚子場屋初試七日合格視第如拾芥耳偶聞路人語重慶郡丞病郡丞者中憲公也隱君遂叱馭入蜀同舍生強留不顧至渝中憲公果逝隱君嘔血數升幾絕奉柩露宿道經播州播古夜郎地雲霧晝霾虎豹晝行一夕有虎咆哮人皆避走隱君泣下不走虎掉尾去又隱君之廬曾火君左手抱中憲公主右手扶太恭人出餘不顧火旋息昔時弘農渡虎伏棺滅火皆仁孝人也隱君有馬中憲公清白吏歸橐蕭然隱君曰襄事我任之若等下帷殉業勿墮其家聲九原者不死矣躬葬中憲公成禮篝燈促諸弟讀書葬年餘而僉憲公舉六年郡丞公舉十二年憲使公登第多隱君力云歲壬戌隱君應貢如京師僉憲公以戶部郎謫判通州隱君往慰之一日忽病嘆曰我思母氏不願仕也遂棄牒歸而母果病瘳子壻龔士傑貧也龔得補隱君貢而母病愈自是精醫不視人病視母獨効僉憲公守涿忤中貴人詔逮下獄涿民叫闕

得免謫判辰州隱君會于武陵止僉憲公勿歸
願報明主恩僉憲公有辰擢按察分巡川北
人尤高隱君之識云隱君處諸弟斗粟尺布無
私也竭力于甘毳之食比太恭人卒諸弟仕矣
且曰親葬自盡耳治之如中憲公而隱君遂病
有姑氏適周儒者老而寡兩女弟貧而寡龔甥
婦少而寡隱君周之舉火令躐居忘媼處也其
厚如此乃庠校中有前人惠政或一二儉人所
亂鳴于當道力挽之諸寬博吐舌憚邵生云歲

戊午有私塲屋關節者隱君曰蘇公于李方叔
無益也幸謝故人又節槩之大者隱君生正德
丙子五月十三日卒萬曆丁丑十一月二十四
日享年六十二以某年月日葬某山之陽配王
孺人生一子即以道娶沈氏中萬曆元年鄉試
側室劉氏生二子以恂以默生員嗟乎古人言
富貴勢之中也貧賤勢之壓也士材之人達有
勞謙之稱窮有著明之節隱君平生大節可銘
也銘曰

蓬累而行鴈序駕也豹隱而文鳳毛舉也敦篤
大倫範而家也玄廬高原永終譽也

太醫院醫官中橋劉公墓志銘

太醫劉公卒且葬其子維年請余銘憶公欲受
我禁方傳諸其人今公以天年終詢其子無有
也恨不起公九原而吐之又童子時公切余脉
俄而起曰可屬大事乎三十年來無以報公異
日有因余言續醫史乎而能報公乎未也乃按
友人蕭凌雲狀而次焉公諱相字士良號中橋

江西廬陵人始祖迪仁自德安教授遷沔陽別
駕卒于沔遂籍爲沔人世習醫六傳而有九達
即公之父也遇日者于長安市中談公貴謂當
以醫顯不以青紫也命公罷舉子業專于醫公
發憤而嘆曰古有俞跗及秦越人見垣一方而
知五藏癥結者即天授能外內經素問也取內
經素問而潛心焉聞病之陽論得其陰聞病之
陰論得其陽而公名滿閭巷矣嘉靖戊戌公方
壯年會肅皇帝有事顯陵疫且作大司空顧璘

東南才子方鳩僇工得公大喜全活甚衆而公
被其言論翩翩文雅矣會大工告成撫按交章
薦公授公南京太醫院醫官欽賞白金三兩蓋
異數也石首張文簡公壁爲伯宗試公大喜徘徊
數歲公以母鄧孺人老告歸矣近而叩門遠
而虛車以公爲神公益精于脉如郡中太史童
公承敘方予告公診之退語人言脉法曰脉長
而弦不得代四時者其病主在肝肝如泥月餘
必不起已而童公逝御史胡公彥方宅憂公診
之退語人言脉法曰脉來數病難去而不一者
病主在心心如膏火年餘必不起已而胡公逝
兩公未病而公危論歲月不爽也其它疾居腠
理者則曰湯熨之所及也在血脉則曰鍼石之
所及也在腸胃則曰酒醪之所及也在骨髓則
曰司命如之何故有異症而公無難色庸醫之
所畏也人或易視而公搖首巫咸韓伯休望而
走也百言百當百試百效暇以古法書名畫自
娛時與親知結宴游之驩酒酣耳熟多誦唐杜

工部甫明孫山人一元詩當其會心抵掌談說
旁若無人又好商拳較矢公其游於酒人哉而
一念活人垂老不倦語曰用志不分乃凝于神
其公之謂乎事母極其毳之養以孝聞待弟姪
曲盡友愛教其成立有司高公行請爲大賓屢
一與焉鄉人德公無間顯約會來哭公者幅抑
失聲公生以弘治己未年六月十七日卒以萬
曆庚辰年正月初一日年八十二葬以是年十
一月十八日墓在某處配袁氏蓋勒儉而助者
子一則維年側室王氏出郡諸生蓋少俊而文
者娶童學諭承祐女孫男一曰永亨聘袁諸生
大才女孫女一適丘戶部主事騰子民祝繼娶
方衛尉東升女陳子曰太醫終身誦顧尚書不
休云感恩之士乎家按察舉高年會以太醫爲
九老每言士良篤行君子寧獨醫也州里言太
醫婦人科耳余所覩記可耳目痺醫可小兒醫
寧獨帶下哉誌其大者而銘焉銘曰而封高而
名遠而活多而後顯嗟嗟太醫藏漢沔

四川威遠縣知縣蕭君墓誌銘

威遠令蓋不佞故交云往雅游先按察公與先
兄光祿也在師友間而不佞少威遠君二十餘
歲威遠君畏友視之後不佞督學入蜀時威遠
君訓綿州轉諭崇寧縣故事學使歲試高下其
教屬余兩試首威遠君入覲之年故事學使殿
最教屬聞于銓曹以爲黜陟余又首威遠君自
是威遠君名赫赫三巴矣威遠君坦直無他腸
風流自命髫年屈首誦詩補州學生以肅皇

帝龍飛改補府學生今封工部尚書曾公藩撫
貴州都御史劉公庠與威遠爲文社屢試不第
表叔戶部尚書傅公願與先公聞郭南社威遠
君相從于風浴借山亭榭間嘲詠花鳥以高陽
生自許間一放歌坐上盡傾貴交而不諂善譔
而不霍竟酒而不亂真長者云至教綿州崇寧
每嘆曰士之從化若泥在鈞也先德行而後文
藝爭相砥勵發爲詩篇多唐人格律及令威遠
威遠在川南道民悍而難治威遠君曰雷霆百

里縣令象之柰何負郎官也于是鋤豪強招流
亡平稅定役載星出入偶諸生帷薄不脩者繩
之以法稍稍謗起又狀昂昂少訕上官多且皮
相又貴耳坐威遠君落職威遠君故倦游一夕
暴卒人言死且異不佞謂威遠君素達政事高
非未能操刀而製錦者柰何有是人言僞耳生
正德壬申十二月十五日卒萬曆辛巳十月二
十六日春秋七十矣威遠君諱狎字凌翰號漸
山先世蘇州吳江人其始祖某從高帝功授

河陽衛百戶祖某征廣西功陞指揮僉事父處
士鳳以財雄郡中男子五入學宮者四而威遠
君其長也遺言葬我從處士公傍在張家垵威
遠君始配繆孺人子如龍如光繆葬他處繼王
孺人子如玉郡學生如玉少俊有文不佞門下
士泣而請銘銘曰蜀道難而易江漢廣而帶師
牧之名永不替威遠之藏千萬世

樊姬墓誌銘

樊姬者景陵農家女也父相母李氏嘉靖甲子

童恭人納爲陳生箕箒名曰貞慧乙丑隨官京師屢胎不育一日請曰妾愧無能進勝已者日夜事公弄筆墨此前因障也聞與豪士多談冶容誨妬願少藏之時已抱病倘所謂其言善乎隆慶庚午隨恭人南歸道卒葬臨洛關閱月余過之夢曰妾化爲狐矣意首丘耶携歸沔葬蘇阡後萬曆甲戌過關夢曰妾化爲石矣意勒文耶心許之壬午再過夢曰妾無生氣矣意少余文耶感而痛焉姬生甲辰某月日卒庚午某月日年二十七事余七年耳十又四年而始銘銘曰游洛者神也藏沔者骨也寄思者碣也著

行狀

明故進階中議大夫資治尹山西提刑按

察司副使先君行狀

命四

西園文集卷之十二

終

隆慶庚午隨恭人南歸道卒葬臨洛關閱月余
過之夢曰安化為狐矣意首丘耶携歸沔葬蘇
氏後萬曆甲戌過關夢曰安化為石矣意勒文
曰泚水昔年亦瀕西昔曾遊其地昔斷也少余
日半二十五年余少半其未及四半而後終

西園文集卷之十三

沔陽陳文燭玉叔著

行狀

明故進階中議大夫資治尹山西提刑按
察司副使先君行狀

萬曆庚辰三月廿四日先君按察考終命四月
十六日不肖督運至濟寧家人以計聞天乎不
肖罪何逭焉戊寅秋別先君之淮明年巳卯冬
先君寓書言思不肖甚也不肖奉不上命造舟

通畢而新運至方入京計歸而竟不少延矣天
乎不肖罪何追焉一夕夢先君語曰吾登第三
十年歸田二十年平生無愧天壤死可矣誰定
吾言誰表吾行耶相與大泣淚泫淫滿枕上覺
而夢也天乎不肖罪何追焉憂病幾危恐溘焉
朝露墮先人遺行矣忍痛而筆焉先君諱柏字
憲卿沔陽州江北村人天順朝有祖義民公諱
勉輸粟賑饑奉 旨旌表義民人稱義門陳氏
云義民公有兄諱勛仕至山東青州府知府義
民公生高年公諱廷器高年公子四少承德公
諱泮女一封太淑人適通議傅公昇表叔大司
徒公願之母也承德公與吳太安人隱居篤行
詳在大學士李公春芳誌中先君生而穎秀異
常過日成誦年六歲有郡守徐公咸勸農伯祖
竹塢公應里役出先君見之若成人狀屬對如
響徐公竒之揖竹塢公云此子奚啻如青州公
耶諸生有任公鳳岐豪爽士也生先恭人端慧
授以小學內則列女傳即成誦嚴子擇壻得先

君妻馬年十二應正德己卯試張公邦奇爲學
使奇之命郡守李公濂再試試日乃從者病莫
能興先君以爲病其道之莫能興起也李公奇
之曰吾得童士疇又得吾子其雙璧乎携入衙
內夫人治其歛焉乙酉應試與表叔傅公齊名
祖姑愛之如己子時生先兄文燮莆田王公鏊
爲學正有才名教先君改春秋而戊子仍以書
舉于鄉年二十三關中許公宗魯爲學使稱禮
陵曠宗舜華容孫宜爲中才云先君自是
博極羣書潛心大業經史諸子百家無不涉獵
每一落筆茹古涵今渾渾灑灑不可窺測庚寅
入南監與少司馬沈公良才大司寇馮公天馭
結爲文社一時名儒莫不願交乙未下第入北
監童宮庶公承敘張文毅公治與傅公方官京
御同先君登海印寺閣先君賦鏡光篇張公童
公大加稱賞袖示翰林諸公諸公曰世有如此
才乎吾輩偶處此耳大學士趙公貞吉大宗伯
尹公臺大司空朱公衡編修唐公順之莫不停

車過訪先君名赫赫動海內矣丙申歷齊魯泛
江淮而歸登太和山禱于至家得竒夢而不肖
生小字武當蓋四月八日先君又喜得子也辛
丑下第卧病慈恩寺取佛經讀之齊得喪而一
焉謂人性本無不善聖人爲必可師陽明先生
良知之說其孔門相傳之秘乎時與詹事程公
文德祭酒鄒公守益學士敖公銑給事中尹公
相披襟寓書歲無慮日而先君大有所得矣甲
辰下第祖姑傅淑人隨表叙官吏部強先君選
而承德公意亦切乃先君竟不就也丁未下第
卜築于蘇阡即今葬地也中有喬木可丈圍者
槁而更生先君曰豈人心不若山木哉顧所養
何如耳舊號太蒙遂易其蒙曰蘇山學者稱爲
蘇山先生庚戌禮闈翰林黃公廷用得先君卷
竒之張文毅公主試一見先君名欣然曰此吾
鄉志士也黃先生可爲得人而歐文莊公德素
知先君名稱善良久後謁張公公曰子幸第獨
歸生有光不第耳至廷試張公薦先君卷爲一

甲分宜阨之張公拂然曰士登第耳何計先後也張公每語尚憤不平也時時引薛公應旂與先君同坐歸薛俱名流張公門下士也是年冬迎吳太安人就養京師北虜至城下先君觀工部政尚書李公士翱命先君守城兼運糧草隨吏部侍郎王公邦瑞數日談虜情若素習者諸公大竒之徐有張公之喪肅皇帝遣官造墳例差行人先君以進士往辛亥夏日歸省承德公置酒高會相晤數日而承德公即世矣先君哀毀守禮含殮棺槨以至于塋靡不誠信甲寅謁選當事者知先君才選兵部職方司主事永豐聶公豹爲大司馬相得甚驩時與比部高公岱徐公中行梁公有譽給事中吳公國倫揚摧風雅丙辰夏乞差歸省吳太安人甫至家而汝壁生小字畫錦先兄有堪佳二子先君喜其多孫也是年冬北上明年考滿得勅贈承德公爲職方司主事封母吳爲太安人陞職方員外轉武庫司郎中戊午之秋時北虜犯邊南倭掠地蒲

州楊公博爲大司馬調職方郎中掌司事其年
不肖舉于鄉肅皇帝綜核邊事操下廩廩稍報
警則威有所不測而分宜與子世藩交弄大柄
嬰視百職南北債帥苞苴其門凡建一議置一
帥得請而後可不爾禍立至矣先君陽受指而
退必伸其意寧拂權臣而不敢屈天下之公議
如王直葉宗滿寇浙直數十郡後執而告俘賂
分宜父子先君竟守國憲論死磔于市分宜銜
之楊公經畧宣大而左司馬江公東掌部事推
魯少文羽書交馳搖手索息不能出一語先君
于諸路奏草朝至而夕覆無不當上意者偶江
公答司吏一人死者先君言曰吏無罪而死郎
中之過也江公愧謝而中恨焉總督胡公在浙
直上遣給事中羅公嘉賓御史龐公尚鵬往勘
焉二公論胡公養寇要功而分宜父子意欲不
直前疏謂先君曰職方見科道疏耶殊無禮之
甚先君曰胡總督固才但老師費財掩敗衄以
爲功如公議何分宜大銜之江公股栗者數日

先君亦心知胡公功其危言若此蓋欲直給事
御史之言耳肅皇帝集廷議僉以臨敵忌易將
下兵部覆先君遂草疏云掩瑕錄瑜以冀後効
者聖明使過之仁也據事論事以懲不恪者人
臣奉法之義也覽者躋之而鄭端簡公曉每見
先君輒稱頌之後不肖見龐公以先君爲難及
云太守朱公孟震刻職方題稿都御史張公佳
胤爲同舍郎序之俱云本朝在楚有兩職方齊
名華容位上卿沔陽淹晉臬有幸不幸耳二公
知言哉先君無愧色矣己未冬先君以防秋事
畢受欽賞而大學士徐公階知先君有文名
薦爲福建提學副使分宜又阨之庚申春先君
念吳太安人乞外補得井陘兵備方司疆場不
能歸草疏終養徐公揚公止其疏勿入將大用
先君忽有太安人之變聞訃痛絕士民遮道泣
馬歸來沔大水死徙出鄉積屍盈野先君捨地
古城買棺葬之即在井陘財數月耳提兵曲陽
過倒馬關駐插箭嶺由浮圖峪走紫金關守蜚

狐諸隘口是年虜擁衆入掠大同朔應忻崞諸處十餘日遁去先君整兵伺之謁宋楊延昭父子廟摩挲挿箭祭刀曬甲諸石低徊留之不能去作忠節廟碑讀之似奪羯胡而噬之者歸駐獲鹿天久不雨蝗大作發倉粟賑之爲壇禱焉大雨三日父老感悅以爲精誠格天先君作時雨軒記于道中辛酉葬太安人畢任恭人忽逝先君哭曰喪吾益友矣方起復而癸亥京察江公總督宣大投揭于吏部大宰郭公朴司馬楊公力救之而謠諑者先竟坐不及調外任先君嘆曰世溷濁而不分兮好蔽美而嫉妬不量鑿而正枘兮固前脩以菹醢三閭大夫之言非謂我耶于是卜居爲終焉計携不肖復城中歲甲子而汝圭生先君喜不肖得子也乙丑不肖登進士命不肖代草致仕疏疏上不報楊公轉冢宰移書先君收之末路而先君絕意仕進建讀書閣于復中樓西閣甫成天新雨偶登其上沔本無山去江南諸山尚遠一旦崗巒臺榭人物

如畫近在几席先君喜曰海有市江亦爾耶悠
然見南山竊比柴桑翁矣顏爲見南江閣上自
丘墳下逮術數拾華尋根尤喜星家言與傅司
徒公良辰佳節賞花對月兄弟姁姁然樂也隆
慶成辰不肖以大理寺評事考滿上書先君始
奉穆皇帝旨以憲副致仕益徜徉于烟水之間
開草堂于南紀門外傅司徒公有山亭在左先
君曰寄形宇內亦借耳豈獨山也仍開借山亭
種樹養竹意澹如也監司有司非專訪先君先
君避不見而四方求文翰者日衆操染應之了
無倦色間爲小令命童子歌而佐酒所傳夏汭
樂府藝林比于汧東碧山蓋先君子詞雅愛康
王也萬曆改元 詔進中議大夫當三月三日
設宴于德星坊延里中諸老爲高年會幾至百
人毛道人太真年百歲自武當來陳山人紀八
十自江西來鬚眉龐白比于香山洛社云二
年甲戌不肖轉四川自淮歸稱壽僉憲余公一
龍先爲七十文壽之乙亥七十海內械詞而祝

者六一和答焉戊寅三月不肖轉漕儲自蜀歸
稱壽先君孳孳好學垂老不倦開晚節堂取子
美律細之意而方伯莫公如忠復扁大業堂寄
焉先君喜曰文章乃經國之大業願與汝懋之
遂賦四懷以見志蓋周尚父衛武公秦四皓漢
伏生也不肖八月復歸自淮先兄以國子生授
光祿寺監事無何堪任二姪卒先兄亦卒先君
情稍稍倦矣己卯春多在退樂軒中喜讀果臝
文元公迦談因悟禪家之什迦吾儒之孔子也
解纏縛而驅障礙本於智仁勇之力刪註四十
二章自是詩文絕不爲也庚辰正月遣使侯先
君善飯無恙時時走隱林庄隱林者先承德公
躬耕處也及三月家兄文炳來得二月書手澤
尚新而今已矣嗚乎痛哉不肖胡不自絕也詢
之來使者先兩日約友人賞牡丹是夕呼家人
檢衣并棺自言將辭逆旅先君七十以後飾巾
待盡齒髮有脫藏之以殉無病而卒兢兢然啓
手足而示之全生全歸一如古人獨未與不肖

面訣有隱痛焉不肖之罪上通于天矣先君生
正德丙寅六月十三日卒萬曆庚辰三月廿四
日壽七十五十以壬午年四月十日葬于蘇阡
娶任氏封安人贈太恭人子二長文燮娶謝處
士警女次文燭娶童典術承祥女封恭人孫男
四汝堪娶賀守備襄女繼娶孫氏汝佳娶王給
事中願女俱燮出爲諸生早夭汝壁郡學生燮
出娶廣東肇慶府張通判栢女少繼于燭今仍
稱父汝圭國子生燭出聘雲南按察司歐陽副
使栢女孫女三燮出一適庠生童行先燭出二
長適常德府武陵縣進士龍膺次聘戶部員外
傅作霖子嗚乎先君慷慨剛正心事磊磊如青
天白日聞人一善必揚之無分面背至于過失
口悛悛不忍道取與之操嚴于一介與鄉人處
和而有禮平生無食言亦無一事不可言者文
房諸器勒銘自警事承德公最孝幼好樗蒲吳
太安人偶怒終身戒不爲每語不肖兄弟云凡
人孝友多衰于妻子古之聖賢兢業正在此處

也與先恭人如賓每誦詩各約百首聞先恭人誦百里奚屢屢歌笑曰即富貴胡忘也念任先生輒泣下表其墓撫其孤育其孫女嫁焉待庶弟樞如同胞伯兄杞卒于化州哭之成病仲兄松卒于京師具棺殮焉族人貧者周之患難者恤之有姪文炳無辜被誣移書當路力雪其冤孝友天植云教先兄極嚴喜其成立每同諸子登先兄聚星樓輒把酒揮毫性好客飲不多客醉而興始盡思立五經別註不果徘徊復中精舍口其大旨壁圭二子筆爲語錄里中後進出其門者多取科第彬彬盛矣少與郡中馬孟遠孟良李天恩友善二馬早世作兩名士墓表李君寵死手其詩嘆曰吾之方叔也爲文哭而賻焉每語不肖兄弟曰士未有負朋友而忠于朝廷者作沔陽人物考下逮細瑣敦倫化俗以風閭巷所著有見南江閣來青軒詩選文選借山亭前集續集退樂軒詩選大業堂尺牘數十卷樂爲蘇山全集南充大學士陳公以勤序其質

而腴婉約而有致蒲州大學士張公四維序其
書容與成一家言先君早年詩歌學高岑近
體學沈宋文章喜韓退之曾子固昭代方正學
王文成數人而已晚年宗杜與司馬遷善乎周
山人天球謂國朝前有北地信陽後有歷下東
海先君從中振響可揖讓于何李李王之間往
不肖登峨嵋以先君集付高僧鑑燈藏之名山
而先君亦有夢游峨嵋篇寄刻山椒人以爲奇
語曰蓋棺論定先君行履高潔文詞爾雅紹前
脩而俟來哲千百世足傳矣獨旂常鍾鼎之業
可就立而濩落終身海內搯腕即先君口不言
而意常墨墨也果造物忌名耶文燭僕邀不肖
子也四歲持扇索書先君驚異即書漢終軍唐
王勃諸人不足效而惓惓以宋陸子靜期之謂
少成若天性云嗣官廷評則曰定國可師也守
淮安則曰長孺可師也督學蜀中則曰經師易
入師難也比造舟奉 溫旨及河工受 欽賞
則日報 明主之日也德業文章必欲凌駕古

人乃疲駑無能爲也將何以見先君于地下哉
敢述遺行而屬執事者文焉先君死且不朽矣

墓表

孤嶼山人項思堯墓表

國家試士多茂才異等如吾友項思堯者亦異
矣終絀弗用又弗壽以死方移文投吊而其子
繼祖浮淮訪余思堯每謂余曰要之死日文章
乃定定吾言者非公耶乃今題其墓矣安得不
憐才悲慟也按項爲永嘉著姓君諱文煥字思

堯號爲齊居士廣東叅政公喬之伯子也叅政
公有重名往與羅公洪先唐公順之交甚驩也
思堯兒時從游聞其議論退而唼唼私有所折
衷二公識賞終其身遇以國士然英氣已嶽嶽
不下人叅政公裁抑之後郭公宗臯上封事忤
旨外叅政公上獄中書其事於詔廷杖絕糧幾死叅政公遣思堯侯之思堯踰
墻置薪水不爲邏者所得而郭公賴以生全年
財十三耳及叅政公守廬陽雜試廬士中常居

高等後督學孔公天胤大奇之補餼廩屢試屢不第將以貲遊國學會河間人王聯者誣奏一二賢豪叅政公以守河間被逮君以前貲調護又代叅政公上獄中書其事得解散復稱貸應例而叅政公卒于東粵矣君遍求海內名公撰碑勒銘著爲歐東實紀令其名赫赫不朽云往北試有及期傳大父封君公卒者其友強之入君嘆曰方寸亂矣吾何忍不爲吾父盡地下情耶竟持服而歸時永嘉某令慕君才名大加禮遇忌者爭毀部使者購捕甚急寓居京師事漸自至丁卯病不能試也東書東歸閱月而卒君生于嘉靖壬午某月日卒于隆慶戊辰某月日以是年冬葬竹浦石門山下年四十七嗟嗟思堯磊落振奇人也往叅政公爲廉平吏囊甚寂而君以節俠自負大致饒裕喜談宇內名山大川土風人物友愛二弟文蔚文言怡怡如也所著亦與堂稿藏于家假令思堯不死得行其志功業當無量然槩觀平生夫豈怵迫之徒汶汶

東西者耶其子繼祖光祖守祖敬祖是將大項
氏者詳在督學何公鏗誌中
陳子曰往滌陽胡公爲冢宰與叅政公善一見
思堯與談大計思堯憤疾世事氣髮上指又多
推轂賢豪胡公引爲上客古稱寥郭之士在布
衣之位談說當時折卿相之權者非耶至死乃
曰題我孤嶼山人之墓後人過墓下其以此想
見其人

奉政大夫四川按察司僉事邵先生墓表

普安邵先生當

肅皇帝朝守涿州被逮直聲動天下重于九鼎
入呂而季弟憲使元哲竝以節氣文章顯海內
稱二邵又伯氏隱君元吉叔氏郡丞元高翩翩
有道者人或稱四邵云先生卒年五十五業有
銘其幽者乃不佞志其大于墓石季弟之所屬
也先生有辭于永世哉先生少穎敏讀書一目
終身不忘從中憲公游京師受學于溧陽馬公
從謙馬公爲光祿卿有文名見先生大喜謂中

憲公曰阿郎千里駒獨性太直恐世難容耳先生以禮記舉癸卯鄉試四試不第始謁選授嶧峨縣知縣嶧在雲南萬山中治十二鄉黠夷暴亂官無一人得善去者先生曰夷狄之有君也柰何朝廷官徒名存乎選良民爲十二總令俾之奉上行下若身有臂指也一日夷阿隴龍信者率數渠魁見掾史白當擒先生善諭而遣之捕得盜礦者夷阿佑劫去先生嚴檄總令率首惡見先生陽曰殺之三而陰諭總令救之三諸夷德總令甚聽勾稽而法行矣甸中鄉有摩訶神土夷先卜而後訟先生朴其像責曰聰明正直神也爾佑諸夷不道冒血食久叱左右杖如律火之是日雷擊祠前樹石民謠曰莫爲惡神被縛邵爲令神聽命云聞于當路薦䟽屢上膺內召行分宜當國先生無可賂者年餘補戶部主事一夕有御劄取錢穀的數尚書賈公錯愕先生請曰攢寫須蘇浙書工可也賈公業葦此葦先生權用之分投召至又指授總撒計字分

錄五鼓冊成賈公大喜部差難者必借先生焉
辛酉坐風霾考察調通州同知分宜銜之也先
生佐通多風節事後聞喜張公守申知通州總
督東郡楊君中丞廣德徐公特疏曰國家東馮
首通西馮首涿陛下用張守中東馮稱強幹
焉欲安涿民無如邵元善者上果以先生守
涿涿之土田半入于權璫家偏累民窮次骨也
先生照糧派差不少假借抗不應者置之三尺
東廠滕璫者涿人也竟不堪中以飛語奉

詔逮獄涿老稚千人叩

闕聲寃部擬降調而

滕欲重之大司馬蒲州楊公曰涿民尚不去有
登聞一擊耳滕稍解而涿民又擁吏部門還我
邵父邵父廉平去則吾屬無類矣太宰安陽郭
公曰取邵所編差簿令恪守之有更張者奏涿
民泣退大學士華亭徐公憐先生才調判辰州
而先生倅辰發奸摘伏一如神明乙丑春常熟
嚴公爲吏部知先生深擢四川按察司僉事時
川東遭蔡伯貫黃中甫平之後先生以川北道

攝之政令更新兩臺交薦先生而忌者日衆橫
被口語先生遂浩然歸先生喜飲飲輒數斗又
喜詩詩似唐人援筆輒千言今賢奕稿是也生
平感慨重諾然無卑卑阿世之態見卑卑阿世
者大罵不休直道而事人宜先生三黜也光祿
馬公言尤信云先生諱元善字繼之又字長卿
別號台山其世系配嗣生卒日月詳誌中陳子
曰往邵先生寄碧雲洞賦且言游西南張本耳
先生有意乎及余入蜀讀先生綠雪亭詩風節

凜凜晚讀和陶詩優游柴桑足永年也乃不止
壽死何哉先生不畏強禦能毀淫祠往牒有若
而人至今有生氣則千百年後知先生矣敬表
曰有明賢大夫邵先生之墓

十嶽明故中順大夫山東青州府知府陳公墓

鳴謝表

中順公沒百五十年矣先中議公欲表其墓命
小子屬草二十年來奔走南北今中議公地下
而中順公墓石尚虛又諸父諸兄弟勉終其事

憶中議公言泣下也敢誌其大後人拜墓下想
見其爲人中順公諱勛字功懋彥昇公之長子
也生而長身玉立雙瞳炯炯如電大異凡兒穎
記絕人目數行下年二十四以書經舉永樂庚
子鄉試時徐璘李琮號里中三俊乃才望獨推
轂焉公屢試不第宣德二年謁選吏部大冢宰
試其文第一授本部司務公在部久風采凝峻
傾動縉紳雅善品鑒裨於用舍海內賢豪如楊
文定公溥劉文安公定之錢文肅公習禮皆折
節下之所題歲寒壽星九老諸圖墨尚新也九
載考績出守青州府青州古北海郡地瘠而民
悍公加意拊循教民孝弟力田每行縣省耕繪
爲勸農圖興學造士人文丕振詳在修學碑中
未幾患足疾䟽乞骸骨上許之得致仕年纔
四十餘耳優游林下三十餘年建危樓于古城
塢下中藏古書名畫頗多扁曰望京自謂老不
忘君也與其弟義民公爲詩酒之會歲饑發粟
以賑宗族鄉黨賴焉年七十有三郡人周湘官

青州學聞長老咸稱說陳公陳公云有謠曰去
陳府百姓苦至孝友忠信重於鄉閭里中稱陳
大人宅第稱陳大人巷口有藏公吏部時所寄
書中云區區徘徊郎署甄別之道深有愧焉帙
寬寸許楮幾殘而寸襲珍之公下世百年矣海
岱江漢之人口碑若此彼舞智御人與武斷鄉
曲言道德者溺其職矣誰其思哉往章太史公
承敘作郡志未立公傳後中議公得題名董公
謂賢子孫有光祖宗他日當續公傳以補盛事
尚書傳公願謂公之政蹟需久而後彰青州府
志傳公循吏湖廣通志傳公鄉賢遺芳餘烈與
天壤俱可以觀公之大矣公墓在江北古城即
公宅後子孫世居焉文太恭人有賢行與公合
塋傍三塚蓋側室云曾孫文燭曰往守淮安山
人郭第携青州府志共讀之述青人馮學使惟
訥少府惟敏道公循吏之政埒龔黃及燭督漕
入山東二馮之言不虛乃山人會塋中議公問
公墓而遺碣適成請填其諱願世世愛護哉

二酉園文集卷之十三

二酉園文集卷之十四

祭文

三禘代祭灤州王都御史文

沔陽陳文燭玉叔著

惟公恒嶽降秀瀚海儲精南宮賜第筮仕廷評
慎選柱下脩能樹名皂囊論列白簡垂聲始巡
中土河洛澄清再過江右匡廬震驚埋網之輪
攬滂之轡矯矯古人徽音可嗣秦晉歷官廉訪
稱使虜覩北垂塞有烽燧

帝曰廷臣疇咨撫視僉議屬公長城是寄偉哉
保釐寧夏益安方戒部曲禊衣加飡適有論劾
故相使彈詔改內用浩然掛冠伊人權佞言之
永嘆蒼生係望東山嶺岼謂享遐齡天胡不祿
人壽幾何克全五福公子賢科父書能讀遠邁
三蘇不啻二陸俛仰乾坤公真瞑目某在里門
荷公教育繼官直指景仰中藏思公尚起曳履
廟廊邦之戚矣哲人云亡蓋棺論定誰得誰喪
典刑交好夙夜未忘生芻一束揮淚沾裳

祭侍御吳約卿文

維湘有蘭維沅有芷嗟嗟化卿瓊芳並美氣吞
雲夢早拾青紫汗簡懷鉛好脩敦履視草中書
天顏近喜染翰操觚英聲特起耳目攸司繼官
柱史攬轡埋輪古人方軌少陵詩詞動輒盈紙
處嘿清操見于飲水出守太平召還可俟宅憂
南歸黔黎望企真宰無何公遂已矣朝露夕波
誰不有死問之彼蒼公胡止此文考賈誼漢魏
才子壽未期願與角去齒不朽者言他何足擬

凡我同人情深梓里神其格思于丘于篋
祭進士鄭子復文
子復文章金輝玉潤其晉冠南宮者特理美之
緒餘耳而今何絕響也子復才猷山峙海流其
司理洪都者特囊中之末見耳而今何未究也
子復德器景星慶雲宜永年者而又何不壽也
子復心事青天白日宜昌後者而又何無炊火
也古昔賢豪不幸而遭此千載之下尚使人歎
歎莫禁况吾與子復生同于鄉進同于朝而號
稱莫逆者乎訃聞則爲位而哭臨葬則束芻而
奠蓋不啻如韓退之之吊柳子厚歐陽永叔之
哀蘇子美已也子復其聽之

祭富順李水部文

憶昔庚戌獻策清朝與公比翼翱翔雲霄二十
年間悠悠岐路顧我同人飄零如雨昔典水部
卓絕才名左官趙郡辭華驛榮公家尚書業垂
鼎鬲復生侍御彈章稱劄得公早奮望繫三台
家聲曳履庶幾見哉公乃掛冠文園長往至今

恒山傳茲逸響令器元甫視草金閨聞公抱恙
驅車蜀西暫謝石渠親承永訣遊子歸來公心
孔悅訃音忽至吾黨潸然公真不死渺若登僊
原野素旌道遠莫矚瞻彼巴江生芻一束

祭陳評事公鼎文

嗚呼公脩偉之貌磊落之論在人耳目者忽成
今古矣能不慟哉始公登進士令翼城及補廷
中尚思大用而謗書左官且長逝矣能不慟哉
嗚呼公洛陽人也昔漢家有道賈生沉淪千載
惜之方今

明主賜環公卿振滯卽補刺臨清非卑濕之鄉
也公未至止無鵬賦之感也亦悲憤而卒此吾
黨之士所以傷心流涕哽咽而不能語者奚啻
軫存沒于雍門感橫吹于山陽已耶敬陳一奠
惟公其聽之

祭丘戶部子雲文

古人有言一死一生乃見交情余交兄自少恨
不逮老耳何忍生死異耶歲在龍蛇賢士多厄

兄已年而死于齊也果真厄耶朋友之墓有宿
草而不哭往豚兒議聘常哭令愛天絕今哭兄
于寢門之外矣寧知它日不墓哭耶憶昔戊午
同舉于鄉督學劉公冠而奇之即何點之于丘
遲是也孰謂今日而亦古人耶壬戌登進士出
宰固始驟漢循吏百姓禱孫叔敖祠下而令即
生名曰民祝是將大丘氏者雖寢丘無封可也
安知不並祀叔敖耶德州病革時尊公贈官戶
曹尚走使問余以焚黃禮又自起為歌上太安

人壽效昔人斑衣之舞傷哉孝也不可見尊公
于地下耶公家二母節類共姜此劉安人所習
聞者奉姑撫子甚善也黔婁之行下惠之謚其
妻成之也兄何不瞑目耶家大人誄文金石且
曰子雲不壽幸平生完好耳余謂兄好學如子
淵而享年亦同儻所謂天道是耶非耶寤痛其
無定也千里寄奠矢心以辭兄知之否耶

余妻祭外舅文

翁與孺人年俱八十遐齡同永五福並集兒孫

滿前蘭輝玉立科第後先贈典將及乙卯之冬

余妻恭人于歸于我比于朱陳家孫之婦我姪

尤親兩家來往廿年頻頻况也長公愛同昆季

論文輔仁曾不我棄長別有期痛心酸鼻所苦

王程不克襄事去年訃聞江淮之東始也岳母

繼及于翁人言父子恩與之同仰天而痛情胡

有終念翁平生慷慨重義一言相投生死不易

孺人多賢性復好施尊酒問餽日無虛使起家

殷富詩禮世敦天賜偕老優游田園敬如冀野

耕比鹿門古來夫婦高風猶存燭苦奔馳自歲

乙丑十餘年間睽違良久尺素殷勤期望逾厚

賢豪動樹邈焉無有頃者視學單車而西高堂

白鬢兒女嬌痴兼之蜀道徘徊逾遲積懷種種

誰爲訓之歸見長公撫棺大哭藏玉之期聞尚

未卜生存南顧話及寒燠女在天涯共相頓蹙

人生骨肉相聚者常死生之別尤爲痛腸儀不

咸享語不成章寸心如割聊哭一觴

祭傅母楊夫人文

祭傅母楊夫人文

往祖姑太夫人之生吾叔也以賢母著而夫人
之相之也以令妻著人間未有之福吾叔得而
兼之夫人事吾祖母太安人也以姑而其待吾
母先恭人也以姊人間未有之賢夫人得而備
之况乎貞靜比之卷耳勤儉類乎葛覃敬祀昭
夫采蘋逮下幾于樛木宵征詠其肅肅矣而雜
佩兼鷄鳴之戒麟趾見其振振矣而均愛切鳴
鳩之義宜正佐吾叔以偕老乃一疾而彌留十
餘年來先恭人既逝而夫人亦捐館舍燭也言
念疇昔心悴長潛忽忽然承映也故鄉逝矣踈
而陳詞吾夫人其鑒之否耶

祭薛文清從祀文

邃古既遠真儒絕稀今之學者咸尊仲尼懋彼
功業脩彼文辭或忠而過或節而奇質之統系
不免干訾惟公崛起河汾之涯謂聖可作亦在
乎爲深潛純粹敬一自持由窮以達由著而微
細行必謹大節莫移三代是志百世可師頃奉
廷議廟祀永垂肇稱殷禮具主于祠四科之下

兩楹之西伯恭呂氏濂洛並齊公今接踵陟降
于斯逝茲道脉血食攸宜神其來格于直于庖

祭趙文肅公文

自許由窺以歆由蒼而歆

萬曆丁丑冬十二月癸未朔內江諸生祀文肅
趙先生于鄉賢沔陽陳文燭奉命視學事潔
牲載醑爲文而告之曰嘉靖之末先生忤權佞
排和議天下高其節隆慶之際先生談邊事議
營制天下高其才萬曆而後先生閉門著書作
經世出世二通天下高其識卽鐘鼎之勳竹素
之業在先生爲未竟而先生之心天下後世曉
然信之其伊呂之匹荀楊之徒與先生言經世
者不礙于出世之體出世者不忘于經世之用
聖人復起不能易也先生與家大人交驩寓書
不穀約過草堂談古人佳處而先生亦古人矣
從祀學宮有關風教惟先生永享之

祭臨淮侯李盱山文

金青並臨賦十

高皇開國岐陽功多在傳而失如帶礪何公富
才美長于詠歌虎頭猿臂不啻于過

肅宗御極勲舊是嘉中山之後能復幾家公也
承之祖德非遐世藏忠孝光動墨花况也令子
詞賦翩翩二三同社握槩懷鉛青蓮絕調期于
比肩非徒廣牧樹勲于邊十年交好余官廷中
金輝玉潤雅有父風聞公疾邁甫歸江東䟽陳
烏鳥竟得省公及余入蜀訃來夔門覽涕竚立
世誼攸存羞以漢水酌以江繁公神不昧將之
九原

祭初泉劉先生文

燭聞先生有言經師易得人師難得先生抗䟽
于朝則為忠臣就養于家則為孝子楚中人士
待先生而興起者不知其幾往聞訃音相與為
位而哭十餘年來而先生之墓宿草矣燭奉
璽書課士渝州此邦譽髦咸謂先生品流最高
足為人範乃擇吉日主肇祀學宮先生有知尚
其默相伴先生之學得與二三子推明于巴蜀
之間也敬告先生惟先生妥侑之

祭表叔尚書傅公文

嗟嗟吾叔果真也耶非耶又果葬耶今人兄弟
斗粟尺布有難容者吾叔于家大人何驩也古
今竹林惟高阮氏耳况中表乎吾叔于賤兄弟
何愛也憶燭兒時輒謂家大人曰紹武有奇氣
蓋呼小字也冠而字余稱必呼名有父道焉一
日同友人陳子壽走謁吾叔授以川中學約且
曰兩人它日當爲此官二十年後而不肖繼之
且在蜀也薦于當塗內舉不避愧所授者未能
承前脩耳訃聞之日爲位而哭 天子哀悼遣

官祭葬獨易名之典尚缺後必有追補之者吾
叔少年高科德器文章金輝玉潤仁及閭巷待
而舉火往尹廬陵年財二十後翁公繼之並垂
遺愛至今有老翁少婦之謠及官考功兩司察
典黜陟幽明張文邦學士呼爲真吏部使究其
用則湘陰忠靖華容忠宣鼎足而立乃遭讒歸
田十年再起用亦晚也斯蒼生之憾與若位極
人臣澤被賢嗣生順沒榮則二百年來郡中罕
有者吾叔又何憾焉千里寄奠一言一淚吾叔

其聽之
祭甄僉憲文

嗚乎公慷慨磊落人也公自登第二十餘年以御史左官秉憲川西川西之人方駸駸德公而公逝矣公森然玉立斗酒放歌考終之日口談大計偶及譖人欲投豺虎而公往矣公善養生家言多集禁方忽聞公病延醫走視湯熨鍼石莫可救藥而公已矣公每言大丈夫身死而神存卽公英爽之氣麗雲漢而附河山也孰謂公死耶公家給事公有諫名而公善讀父書能世其業又諸子多才翩翩起也孰謂公死耶嗚乎蜀道難兮峇峴千里送公歸兮太原至正酌椒漿兮哭公未已神格思兮于豆于簋

祭堪姪文

吾兄長余十齡而汝少余八歲大人是兒生汝喜我祖見曾孫也孰謂三十年來而汝爲異物耶吳太安人與任恭人相聚謂吾兄多男而阿叔斃斃也孰謂佳姪早夭汝又天耶余舉于鄉

携汝讀書蘇阡汝喜工古文辭日見成立將翩
翩遐舉以紹世業孰謂汝棄人間事耶余登進
士十餘年來北走燕關南走淮海輟汝而就每
得汝書嗣息是憂孰謂汝竟抱無涯之感耶余
督學入蜀汝與二弟匹馬遠送余止于郊孰謂
江臯分手成永訣耶嗚乎東鄉之報胡爲乎來
也東鄉陶令景陵人貽書慰小阮之變余投書
而哭不謂卽汝也夢耶真耶遣人詢之謂汝卒
于武昌不知日月也果真耶非夢耶及家書至
謂汝八月七日就試而沒謂汝且葬又無甘月
也家人後至知葬以臘月之終謂從蘇阡之兆
乃在家園里許尚不知其處也歛不憑棺窆不
臨壙吾何以爲情耶况汝祖已垂白哭汝汝父
以班白哭汝余汝叔以天涯哭汝汝弟哭汝誰
其子汝妹哭汝誰其女汝母汝嬪哭汝哀其婦
人世之痛無踰于此矣

祭張封君文

嗚乎惟天厚先生而生元輔

主上厚元輔而及于先生君臣父子真奇邁云
天下以元輔功在社稷歸先生之功德被羣生
頌先生之德先生垂白而恭崇貴而儉所謂功
若德在先生忘之矣卽欲續楚國先賢襄陽耆
舊之傳安能舍先生哉且楚中相業博雅若李
文正公清脩若楊文定公慷慨若張文隱公在
元輔兼之而三老尊人或嗇其年或窘其後有
紆青拖紫詔金馬石渠之業如公家者乎語曰
天道無親常與善人乃觀之先生无信燭江鄉
後進承服風問方欲請正于先生而少賤自阻
先生往矣爰束生芻蹠而陳詞不知其涕之無
從也

祭光祿兄文

嗚呼大人得兄也早而兄亦早慧周旋五十四
年稱肯子焉近方結社耆英而兄不少待今而
後余奉卮酒爲壽共優游于期頤之外或可必
乎而兄快于九原矣兒壁有雋才周旋不肖者
二十餘年兩姪繼沒仍以奉兄朝夕而兄遂長

三西園文集 卷之十四
往今而後余得目覩其成共勲樹于垂白之日
或可必乎而兄快于九原矣弟以無兄而戚兄
以有弟而快兄耶弟耶又何問耶人言兄富圖
史工詩翰廣田廬結賓客以爲兄賢又以晚拜
一官爲兄幸而不知兄有奇抱齋志而歿向長
有言曰富不如貧貴不如賤但未知生死何如
耳憶兄永訣執弟之手書生死已了了矣况富
與貴乎吾兄真達者也死耶生耶又何問耶獨
念弟斃斃天壤形影相弔受恩未報負此大慙
葬兄耶而忍于外耶哭兄耶而忍于文耶兄知
也耶其不知也耶

祭王池州文

嗚乎觀生池陽太守齊山泛舟促膝而語憶昔
先兄膠漆竝偶小子結盟爾汝雁序登第後先
長安逆旅誓竭清修共報明主司諫南垣九鼎
大呂補闕拾遺黃扉再覩惠政清風留于秋浦
卓矣循良上薄龔魯雅志翩翩無意溫飽臨絕
之辭自謂冲舉九華旄倪痛若父母先兄旣亡

長公亦故暮月之間零落如雨造化小兒胡爾
相苦家君貽書埋玉江滸平生知交留滯京口
臨風一哀邈焉千古炊以彫胡觴以清醕
祭玉伯生都閩文
嗚乎伯生以先輩事家君子而家君子每與和
歌倒屣相迎如仲宣都閩歸來布袍鶴氅逍遙
僊神中人如孝伯臨池揮毫雅有晉法如子敬
至與賤兄弟交甚驩也被酒談天作烏烏聲旁
若無人如景畧昔者吾友今也則亡有不待聞
鄰笛而傷心過酒壚而揮淚者蕙肴桂醑遠致
淮南伯生其聽之

祭內兒童四文

嗚乎昔人謂人不可以無年又不可以無子公
家滄浪洪山及河上諸老年幾百齡乃兄半之
竊恨無年焉太史公武庫公以詩禮名家乃兄
二子學詩學禮大其業也竊幸兄有子焉令妹
于歸交驩日密十年而處十年而別少視青雲
同于拾芥晚慕丹砂化爲黃金把臂之英芝蘭

之友豈無它人莫如吾兄乃知范張款款于下
泉尹班陶陶于永夕想莊惠之清塵憶羊左之
徽烈允殆古人哉去年家鄉哭先兄今年淮海又
哭吾兄手足綢繆它生難結剖心以辭漬淚以酌
祭族妹文
吾叔之擇君寵也紹邾鑒之智焉吾妹之歸君
寵也抱樂羊之賢焉佐君寵之取科名也世青
箱之業焉有子而成行如植槐于其庭也有女
而將嫁不必往送之門也吾于君寵慰以莊生
之達而于吾妹哭以清節之文

祭費孺人文

悲新秋之蕭瑟兮載珠襦于幽宮學瑤木之禪
枝兮望閭風之板桐惟三葉之世好兮令蹇修
以爲通交給事之練要兮知嬪則之攸同聯瑤
佩兮蘭芷集衣裳兮芙蓉鸞鳳翱翔兮飄疾蛟
龍奮雲兮瀕浴惟皓晉以爲期兮羗中道而改
路憶闔闔之洞開兮適聖明之當御彼金馬與
石渠兮羨夫君之獨步坐木天兮玉清承飛帛

今懸圃迎版輿而北邁兮共羸洲而軒翥彰四
教于華誥兮沐九重之湛露適黃扉之塗歸兮
每鷄鳴而戒朝高冠峩峩兮朱被翡翠敞兮翠翹
值虎豹之守關兮翼諫草于雲霄問豺狼之當
道兮助博譽之孤標胡羣小之謏詢兮出星輶
于山嶢閨中之良諭兮謂蜀道其非遙心南征
而日奔兮况雙闈其綿福溘發星之早隕兮悵
良人之塊鞠倏扶桑而濛汜兮天道其何速敵
石火而飈塵兮人世其何促秉彤管有遺編兮
卽泰初而竝俶潘悼亡而莊擊缶兮嗟給事其
堪續傷脩靈之數化兮懷椒糝而與祝

雜著

瑞龍頌有序

萬曆六年丁丑今

皇帝念黃河歲決漕運孔艱命御史大夫潘公
督河事而總漕則侍郎江公兩公蓋同心
拯溺云往潘公上兩河䟽略言今之談者
皆曰濬海口耳而不知海有潮汐茫無可

西園文集 卷之十四
濬也導河者必以海爲壑乎欲順其性先
懼其溢惟當繕治隄防俾無旁決則水由
地中沙隨水洗以水治水是長策也

上俞允而行焉明年己卯公荒度土工羣策畢
舉徐邳之堤如山高堰之流盡築䟽九河
而注之海此昔人行山表木之勲也公猶
橈楫是乘胼胝不遑三月十有八日公至
黃浦時日初塞公回淮兩日烈風大作疾
雷震驚少頃則麗日當空鮮雲觸石澗溪
之旁龍頭出焉古語曰龍升天湏浮雲茲
特脫骨耳揚州府同知韓相在河上走使
獻公貯于紫霄宮中昔漢人穿渠得龍骨
遂以龍晉名其渠而宣房之歌亦欲蛟龍
遠歸舊川子長筆于河渠孟堅志之溝洫
寧獨今也若夫放菹之智負圖之應大哉
禹功明德遠矣况今
明良遇合千載一時必有禎祥斯其瑞乎燭不
佞退而頌其事頌曰

靈湖大壑潛虬生焉踽踽蝮蝮見而在田徵諸
有道文明赫然堯舜在上飛龍御天玄圭允錫
綸命特專蒼水使者授以秘傳玉書金簡夙夜
惟虔負薪野處衣濡裳寒河潤千里海納百川
漕艘擊汰疾如驚颿六府脩治兩儀成平鱗蟲
之長潛彼深淵興雲應鼓連卷翩翩火精木瑞
古有遺篇陽侯川后和氣靈宣麗哉驥晉甘霖
八埏誰言解角遺彼淮暎帝嘉丕績萬鉉無前
龍門砥柱嶙峋並肩桐柏刊旅茲事千年

創業圖贊

此顧長康真蹟十二幅謝安稱蒼生以來
未有也家大人謂虎頭才絕恨少一贊命

小子補焉

伊尹佐湯

所就惟五所聘惟三商家天下保衡是擔

呂望興周

偉矣尚父弼成文武釣渭之陽非熊非虎

周公輔紂

元聖多方丹衷赤舄負宸而治復子明辟

管仲霸齊

轉敗爲功知與爲取桓公主盟仲父仲父

叔敖相楚

循吏化民使高其柵廉吏可爲寢丘封遠

孔子仕魯

用之則行舍之則藏麤裘而鞞父母之邦

范蠡諫越

霸業垂成會稽耻雪鴟夷子皮保身明哲

樂毅扶燕

起而連兵退而報書昌國忠謹齊城爲墟

張良助漢

投書黃石從遊赤松鴻門謝羽子房之功

光武中興

炎正中微桓桓諸將漢官威儀雲臺之上

武侯定蜀

業創三分圖開八陣五月渡瀘蜀山高峻

王猛強秦

臨刑請酒

驚谷爲業捫蝨而談壯哉景略中原虎耽

宋景濂先生像贊

嗚乎正巾而坐辭勝國之聘夫振衣而起佐一
高帝之興乎其文主六經而傳遠信哉視百氏
以爲奴謫于茂卒于夔葬于成都潛溪已矣聖
人之徒

洞山上人像贊

有者相無者空本來面目是爲潤公爲說
達摩大師像大梁張路筆僧洪川廣令請

余題此在少林寺

惟石孔堅惟心孔一西方路遙如來旨密人傳
九年誰計其日有象無言無生始畢之妙二平
嘉定大佛贊

爾身十丈乾坤之中爾超三界江雲一空
東明長老像贊

峩眉僧東明年八十五矣居眞境樓中楊
用脩余懋昭二學士與之游有唐濬師之
風出其像題焉

無相爲宗爾嘗其皓有覺爲心爾悟其早震且
受持爾除煩惱不類衆生爾其壽考

壽星圖贊

有序

往青州公壽星圖錢文肅公劉文安公有
贊正統己未歲也化州伯父珍之萬曆丁
丑家按察公贊于下方小子督學入蜀大
人謂曰三十年後還與汝更贊之越二年
督運江淮山人郭次甫携唐解元圖贊壽
大人語逼錢劉小子步大人舊韻贊焉竝
傳爲吾家盛事云贊曰

瞻彼黃耆眉龐目熒上庠國老南斗瑞星鳩杖
在手九節仙靈白鹿濯濯騰倚于亭子畏名筆
丹青其形林宗高士貽我家庭三山京口可以
作銘如川方至如岡永齡

石贊

醉而粟里醒而平泉依稀乎鬱林之廉平
孔望山在東海上海州刺史鄭復亨磨巖

而請余銘銘曰

積石巖巖東海瀾瀾伊誰登之大哉孔氏歷聘
列國問官郊子從游之徒斷斷闕里雅頌既釐
春秋成史顏淵喟然曾參也唯吾道萬年流行
不已觀海于瀾真難爲水豈無王侯何能似此
曾時則榮沒則已矣東秦在瞻洙泗伊邇勒銘
高山景行行止

鏡銘

應而不藏勝物無傷至人之心無迎無將

書燈銘

惟日不足焚膏以續

犧首盃銘

漢之制犧其首造明時歲癸酉禮飲之將進酒
誰作銘淮陰守

端溪硯銘

得爾巖山封爾卽墨文章光燄爾勿畫

白石硯銘

知白守黑耶草玄尚白耶誰汝之擇

永康硯銘

惟奇石出灌口楊用脩譜爲首吾携之稱益友
映自銅雀視銘

魏武臺建安字千秋遺瓦用不置

幹爾筆銘

吾不爾投爾不吾夢慎哉衮鉞毛穎之動

錯字墨銘

易磨者形永存者神君子則之其名不湮

顧愷之真蹟跋

此虎頭創業圖自伊尹佐商至王猛強秦計十

二幅藏在秘閣者不知何時流傳人間先代題

詠詳矣余每展翫君臣之間情分昭然昔人謂

象人之美張僧繇得其肉陸探微得其骨惟顧

得其神覽之良然

吳道子真蹟跋

杏壇一圖唐吳道玄所繪運筆工緻顏色如新

後有裴相公度楷書七十子姓字可稱二絕家

大人珍愛之以爲觀之如游洙泗間當時以有

若似夫子今求之莫得豈所謂氣象又不在貌

二酉園文集 卷之十四 二十四
耶惟顏曾能傳其心而道玄亦能傳其神

黃庭堅真蹟跋

黃太史經伏波神祠詩自謂病起而書鬚髮盡白蓋老筆云詳在周公瑕跋中復募而勒之石其詩悲援有功名之累不聽少游言嗟乎文淵謂老當益壯烈士當如是卽山谷之字不有據鞍矍鑠狀耶

趙孟頫真蹟跋

余藏松雪齋墨刻頗多而赤壁一賦乃予昂手書精神適逸令人把玩忘疲昔評吳興書如丹鳳狎霄祥雲捧日真與赤壁河山爭雄長哉卽蘇文忠公善書恐當避文敏三舍矣

薛君采手書跋

征家大人輒道亳州薛君采云及讀考功集老子解古稱作者非耶後聞長老言先生以文字交故相故相竊權先生謝絕刪去其往還詩嗚乎美新附卓之辱永玉叔文之累文士蒙詬千載難洗而先生之識遠矣頃會嗣子鴻臚君道

行問先生著書多不存出所與馬伯循崔子鍾
諸公書二冊第俱稟本耳字畫楷密收爲世藏
道行其知讀父書者哉

唐先生手書卷跋

荆川先生與家按察公厚此書十草先生視師
淮陽報家按察公于職方者今集中止刻其一
餘俱先生手書其言欵密如面絕無世套語又
字畫類眉山余珍襲之昔人得劉弘一書賢于
十部從事余于應德亦云

青溪社中卷跋

二雁山人康裕卿有詩名在江海躡齋而余見
擊筑而和余歌甚驩也偶持一卷乃金陵故人
寄山人詩山人思歸矣余讀之則大史邢鳴陽
歸田結青溪社與文學金在衡太守姚禮卿鴻
臚姚元白父子諸顧如懋基孝常孝正孝先孝
康皆尚書顧華玉之後也其詩飄然絕塵有振
衣牛背濯足燕磯之態至聲調逼唐無足論矣
山人情興類是卽諸君安能舍山人弗招以詩

乎諺曰綿綿之葛在于曠野又曰孰爲爲之孰
令聽之余竊憐才而感知音也

會金堂祠碑跋

吾郡會公尹金堂有善政金堂祠焉公會孫三
甫尹富順尊人陽白先生賦詩命謁先生在比
部向余誦之嗣致少叅政受都御史封而三甫
撫蜀遷少司馬行不佞入蜀吊祠下父老談前
事先生寄詩刻焉昔朱仲卿祠桐鄉自謂子孫
奉之不如也金堂顧桐鄉哉乃顯揚若先生父
子蓋希邁云

跋宋喻汝礪漱玉巖記

宋喻公漱玉巖記自號四奇何振卿收入游名
山集中余試士過閬詢故處蜀父老不知也憲
使王元德愛前記勒諸石喻知閬有善政卽山
川被其清風古人之高如此王公墨妙吾以爲
曩中裝尤五奇云

長重書吏部司務題名碑

此青州公往在吏部題名碑也吾鄉太史童公

表叔尚書傅公及家按察公會各題下方其言
足重云今四十年矣嘉靖乙丑燭舉進士觀史
部政時走廳下懷公不置隆慶庚午守淮大人
乃曰興學勸農追烈祖哉小子跪而拜命後得
齊乘楚志二傳書于前董太史公恨未立公之
傳今名宦鄉賢赫赫金石尚書公謂徵陳氏文
獻者不但有茲刻乃今觀之良然萬曆戊寅燭
以山東叅政督漕思過青州謁公祠下乃公期
不果書以志感貽我來世按察公謂公名秩在
銓曹功業在海岱必有慈孫揚焉尚逡逡不敢
當况小子乎因俟後之顯而有聞者

潘中丞公卷跋

往年乙丑潘先生佐大理燭許事命賦崑山草
堂庚午先生撫河道燭守淮命賦留餘堂戊寅
先生督河漕燭叅政命賦芝林己卯工成燭獻
瑞龍頌云昔韓愈自謂于鄭相公事之祭酒事
之東太學事之居守三爲屬吏經時五載奇邁
矣况燭三事先生又在世好十年間乎先生命

手書前作愛我哉忘其陋也吾友周公瑕善詞翰聞訪先生翩翩書記不穀形穢矣

瑞龍冊引

今皇帝軫念江淮命潘公總河江公總漕二公蓋同心云導河入海淮南大治有黃浦口者屢決始塞神龍出焉遺得脫骨二公獻于朝上大悅而異之珍于內府燭曾爲頌頌焉淮安太守宋君伯華與吏于淮及生于淮者歌以矢之燭覽而嘆曰九功惟叙宣房作宮其歌在千載

之上至今洋洋乎盈耳哉考其金簡玉書得于宛委沈璧負薪勤于瓠子歌豈偶致耶卽二公當平世建萬世永賴之功主德邁漢遠甚其舜禹之交乎昔人言得九六之數者有變之理焉龍八十一麟皆九九之數也地平天成太效厥靈乃冊中多紀瑞之辭不佞以爲治世之音時而颺之俟觀風者采焉

蘇東坡蜀岡詩跋

揚州上方寺有蘇公詩隆慶庚午燭守淮憇焉

蓋宋元祐七年公知揚州比于騎鶴仙云其送
人官嶺表惓惓于貪泉之酌是清且惠也豈獨
詞翰美耶萬曆己卯余以叅政入揚比部袁公
訪余言公詩剝落戶部冷公使揚謀刻諸石命
余一言袁公名福徵華亭人曾謫黃有蘇公風
冷公名文煜銅梁人雅意鄉之先達者寺僧其
永寶之

刻家集跋

嘉靖庚申家大人致按察政居見南江閣梓平
生所作爲詩選文選後結借山亭刻前集續集
開來青軒刻詩文二選皆隆慶間作也萬曆以
來徘徊退樂軒以名其詩華亭莫子良方伯書
贈大業堂以名天牘諸公序之詳矣通計數十
卷不肖總爲蘇山全集往辛未守淮蒲州少保
張相公序之丁丑督學入蜀果州少傅陳相公
又序之二公知大人最深中悲大人功用未起
幸文采足垂遠久而惓惓屬小子以大其業乃
小子委瑣齷齪將何爲哉將何爲哉退而述其

大致貽我來世所著職方題稿復中語錄迦談
語解沔陽人物考復泃樂府高年會錄各爲成
書藏于家公暇大人景寂中悲大人世用未試
玉鹿僊丘記跋學人區果世少與刺卧公
異哉顧廷評得古玉瑛乎何宰官之像俠鹿爲
從也又何夜夢僊也作玉鹿僊丘記寄余沔上
蒼翠在楮墨間長康善繪莫能圖也伸長自傳
宇內游好而以不佞爲神交異時騎白鹿而過
焉陳生非夢矣

跋凌中丞遺墨

往凌公季默守沔余以童子相待公出劉元瑞
孫太初手書又出乃祖中丞公所臨洛神賦其
玩意以臨池之業望之乎而少不知學二十年
後復見此帖于公子述知處夫李北海深悟太
令尚病其敬跋若中丞者頓還舊觀矣憶一世
廟時隨家職方公入大內見中貴人指門殿諸
扁咸稱凌公凌公云中丞以字學受知文皇
歷事仁宣二廟蓋有殊寵云

外護書卷引

少虛童子閉關好長生詳在外護書中少白李
子書之而昂生王子圖焉將之東吳願余一言
余聞天隱子謂齋戒爲信解安處爲定解存想
爲閑解坐忘爲慧解至四者通而後爲神解少
虛定且慧矣思神解乎近日吳下張幼于寄余
曇陽僊女像奇甚又讀王元美先生之傳飄飄
有凌雲氣少虛往而質焉飲青精而啖水桃卽
閬風山可到矣書此壯之

書五嶽眞形圖

此圖乃五嶽眞形家君子贊而藏之不佞少以
爲號一日詢圖所自始家君子曰古篆符之文
枕山棲谷之士佩之以消妖毒者也漢武帝得
之王母藏栢梁臺中太初中李充負此泛海無
虞眞物外鴻寶也小子識之 肅皇帝乙丑余
登進士官大理寺評事許太僕元復柴山人季
通刻此圖爲銅章惠焉梁中舍思伯梁廷評彥
國又繪爲圖陳方伯子兼書五嶽山房扁焉豐

吏部人季黎秘書惟敬徐方伯子與甘憲副征
甫郭山人次甫爲詩壯之五君俱屬余志五嶽
穆皇帝庚午出守淮安登太和甲戌入覲過新
鄭訪大學士高先生先生余南宮座主也別時
指中嶽余單騎往焉抵登封縣八里至黃蓋峰
謁中嶽廟有唐徐浩八分書宋王曾奉勅撰碑
登山絕頂謁降神殿有申甫像游盧巖寺有唐
盧鴻隱處游嵩陽觀有漢武帝萬歲山所封大
將軍三栢游少林寺至五乳峰有達磨面壁像
其徒惠可侍之雪深至腰有立雪亭跋陀翻經
天降甘露有甘露臺唐曇宗授大將軍有武藝
僧其蜿蜒磅礴有堯聘許由處有周公測景處
有王子晉吹笙處歸聞于家君子家君子曰昔
歐文忠公至嵩山尋韓文公天封宮題名以爲
快事汝何以答山靈耶欲爲中游記而逡巡入
蜀記峩眉之游高蓋十倍于嵩矣今皇帝戊
寅以山東左叅政督漕事過濟寧游岱宗山在
泰安州之北境余由紅門過高老橋走石經峪

觀秦曬經石讀少司馬萬公水廉洞記經馬棚
巖回馬黃峴二嶺過南天門觀宋真宗御帳及
秦封五大夫松一松在別澗號處士者余比之
魯仲連自是路稍平輿人名曰快活三復由迎
陽洞大小龍口雲梯數百丈上下十八盤比至
天門蕩然平壤謁碧霞元君靈應宮後北至巔
觀秦皇帝無字碑唐玄宗磨崖東封頌南登日
觀諸峰及古封禪臺若增而高若廣而厚秦漢
有侈心哉留三日始下山過靈巖寺探朗公石
來鶴泉鐵袈裟魯般洞諸奇唐人纂十道圖以
爲宇內四絕余游棲霞玉泉不知國清似此否
宿一夕過曲阜謁闕里瞻先師遺像觀手植檜
讀米元章贊過陋巷謁顏子廟過孔林拜先師
伯魚子思墓尋子貢所築室所植楷過鄒縣謁
孟子廟周旋衍聖公顏孟二博士者幾旬日家
君子又命余作東游記而王學憲敬美有作寄
余大都相同余可無言獨余未及吊李于鱗墓
耳吳大參明卿見余東岱詩報書曰二十年前

與于鱗約此生不登泰山不過闕里非夫也今于鱗古人神愴矣足下好遊如子長東岱者其龍門禹穴乎余甚愧焉黃文學淳甫見余嵩山詩報書曰先君勉之與李獻吉約先二室而東岱而諸嶽竟不果也足下償此願乎李尚寶伯承寄余五嶽圖考期余共游考言泰山尊也華山高也衡山廣也嵩山中也恒山急也恒在大同府渾源州曲陽之祀非也丘文莊馬端肅有論矣何觀察振卿見余大和峨山記報書曰足下當與馬第伯封禪儀柳愚溪諸篇千古比隆矣復寄游名山記以當卧游少司馬王公新甫復移書讓余曰足下奈何周情五嶽無意虜庭耶巡邊諸草幸留意以爲它日封狼居胥之助偶以前書質家君子家君子曰余兵備井陘嘗登北嶽廟伯承言不虛後讀唐李冲昭南嶽錄元王處一西嶽錄異于今之志者又聞汝談河洛齊魯之勝岱衡嵩華在阿堵中余老矣卧游耶遍游耶不暇游耶安能爲汝謀耶獨諸公愛

汝等山嶽哉可書之以慰高山仰止之思

脩築古城口并建碧霞元君祠募緣疏

陳子讀禮江閣二三黃髮告余曰江北古城一郡地脉也水蕩而城缺尊公及張別駕曾議築之今遇良父母矣而公可圖乎碧霞元君棲在東嶽世稱娘娘廟也禱子者輕千里宜祠以鎮口而公可文乎陳子唯唯乃言曰善生心樹願結因牙沔本縮水而爲州茲又臨河而稱屏漢桓帝之過雲夢倪文俊之陷王沙轉轂駐三江

環城闢七里之名洪水多年缺口數處行路者痛其無梁堪與家恨其少涉惟版築賴衆義之倡乃真定籍神謀之助遙聞玉女降自天仙居東岱之崔嵬主中原之嗣息况乎時逢聖世遐齡祝日觀之峰兼之郡遇循良熙皞樂天庭之上緣夷巖而拓架地險天成傍巖突以歆神風藏雲構耽耽具闕香火遠盡乎華夷顯顯瑤宮靈應近期于江漢或施穀粟工成大假于西成或布金銀心地廣開乎福地紫煙碧色依稀

赤斧之來丹溜霞光彷彿白環之獻昔頭陀倡
教簡棲尚樹乎豐碑乃勝相藏經蘇軾亦先于
奏記微烈倘傳夫來哲鄙言或繼乎前脩早成
善業之根無遺盡虎佇看功德之報定爾驂鸞
敢假赫躔宜爲露草

存耕倉銘

昔人言但存方寸地留與子孫耕余名倉
曰存耕而爲之銘

無曰千倉無曰萬箱心如穀種存之者昌

其二

芒芒原隰油油禾黍我倉旣盈而遠碩鼠

其三

不昏作勞罔有黍稷是藜是薦我庾維億

其四

雖有尺玉不如斗粟量入爲出一啜乃足

其五

如苗有莠以沙參粒慎之擇之母混所納

其六

盤中食農人汗佃可恤而不可殘

其七

先了官無逋而國急可周無閉而糴

碧霞祠爐銘

蘭煙吐兮慶雲色嘉此器兮永無熄

不谷雲板銘

大小叩和且平依稀乎鐘磬之聲

玉磬五贊

若鴻輕耶若鸞舞耶若告以憂者途人禹耶

其二

華之陰泗之水擊之拊之一夔足矣

其三

勿蹈而海勿糴而齊懸我青黎

其四

萬物告成天下樂之聲聞過情君子耻之

其五

談有俗汝代清聲為律汝永名

六石贊

有序

陳子搆太湖六奇石置寶綸堂前狀若龍
猶有虎若龜鳳若雲飛而人立也諸君以意贊
而不佞以形贊焉

或鞭而睛或鞭而雨神龍之盤澤物為主

嘉石則平肺石則達虎視眈眈永鎮而宅

負形萬古橫波九疇靈山之瑞玄衣督郵

萬仞而立五色而文叩之鳴世旣和且平

得爾太湖疑爾支機翳乎粵草蒼狗白衣

拜則丈人呼則令史願爲良臣貞介如此

龔懋弼字說

余訪同年龔子來于益丁樓中子希富少而才
方游郡校子來命余字之余曰而所希者非周
富辰漢富宗宋富弼乎字曰懋弼可也唐虞之

西園文集 卷之十四
三十九
際君曰汝弼臣曰弼諧是富有之大業也乾乾
夕惕若蓋有日新之盛德云故曰格君者大人
也大人者不失其赤子之心也富彥國相業並
韓范幾于大人者希之則是子來味余言請書
爲字說俾顧名者思義

蒹葭館校梓

二酉園文集卷之十四

終

跋

余小子鮑甥館悉茲二酉藏書得覽
諸集徧讀之斤斤乎若有概于中也
楚自倚相屈平而下其材足多即今
二三大夫蔚然以楚產取重要以本
實峻茂柯葉扶疏則二酉職之其斯

為萬乘器也載而入社先以質長公
長公先得余小子心言若右契獨以
遊各為帙體式異齊必統之同始出
一軌于是為之部署稍爰其繁屬潘
生黃生詮次入梓郡伯濟南高公疇
昔淮陽同事為之授糈居肆以贖其
成居無何集定矣舅方為閩方伯奏
之閩中竊惟三世通家則自王舅王
父始以論著既以昏姻無論舅甥
儼然父師具在以世講則猶之乎膺
也父以世業則猶之乎膺也師律以
象賢余小子無能速肖由是兩步由

是而趨祚于斯庭于斯操几杖于斯
庶幾乎弟子職也非直子壻禮也工
既畢事繫斯語以為矢言
萬曆甲申嘉平吉日子壻龍膺書于
新都公署之斗舍



二酉園集跋
先王父廷尉有廷中淮上翁後
諸集而茲其彙選也汪伯玉王
元美諸先生及名家皆為序業
已傳海內播藝林矣然歲久散
逸蠹編斷簡敝篋欲盡而遺板

又渙不可問遽生也晚會者索
者幾無以應忍令當吾世而湮
滅手可為痛哭廼檢筭中原本
竭獨力以付之梓人得以還舊
觀而供採取焉嗟乎在茲之文
未墜五世之澤猶存是刻也雖
以脩先業其亦有遐思也夫
天啟癸亥九月重陽日不肖孫
之遽謹識



三原圖集

大... 卷... 第... 頁...

... 卷... 第... 頁...

... 卷... 第... 頁...

... 卷... 第... 頁...



